

# ETEHUE'YO JESOSAJA EPEEJJI CUANA EMEOJA ESOHUIJO MIMIANI YASIJJE HEBREOS

---

Eyacuiñajjiya oja Bacua Ejja huoojea canaje ona oja esohui ba meeya

**1** <sup>1</sup>Ecuea epeeji cuana quea huiso meshijo ba'e, yahuajo nei nei Eyacuiñajjiya ojaya epeeji nei cuana huoojea ca poa esejaya etiiquiiana que, Jodio etiiquiiana que. Jama poa ba'a: “¡Huohuiquicue Jodio cuana huasijje ecuea ejjashahuabaquijji ojjaña ebajji! ¡Huohui majamajacue oe!” Ma huoojea nequime aca poa; pea mano'yajo huoojea'yo esohui huohuijji aca nequia poa. Oe esohui huohuijji quea huiso huohui meesahua ca poa Eyacuiñajjiya ojaya ejjashahuabaquijji. Pea esohui huohuijji pea esohui huohui meesahua ca poa ojaya ejjashahuabaquijji pea'ai. Jamatii huohui jjima poa ojjaña Eyacuiñajjiya ejjashahuabaquijji. <sup>2</sup>Jjeya ca ca Eyacuiñajjiya oja Bacua Ejja Jesosa Quito bajjani huoojea canaje eseya ojjaña ojaya ejjashahuabaquijji ba meeya. Ohuaya Jesosaa oja Chii nijjeya ojjaña pana ca'ya poa, ojjaña aquiiana meshijo e'anijji, eyatahuatahuajo enequijji pea'ai pana ca'ya poa. Jamajjeya ojaya nei aquiiana. Jesosa ojjaña huoojea'yoggi poani tii tii eyajo, meshi cuanajo pea'ai. <sup>3</sup>Jesosa oja Chii jayojjaya poa. Quea pame nee nee, quea ca'a nee nee. Jesosa oja Chii jayojjaya poani tii tii. Oya quea sohui poja nee neeya jjejojo ojjaña nequi mee ca poa. Ma ecua ohuaya yahuajo huohui ca poa jamaya acani ohuaya jjeya ojjaña eyajo nequi, ojjaña meshijo nequi pea'ai nequi ca'a tiitii mee cani Jesosaa. Oya ojjañaja mimishi cuijea'yo majje, ma ojjaña ojaya epeeji epojjiya mimishi cuijea'yo majje anioquenaje oja Chii pejejeo ebianeijje. Jomajo oya, Jesosa ojjaña huoojea'yoggi poani tii tii. E'e, Eyacuiñajji, Jesosa pea'ai quea ca'a nee nee po tiitiiani. Pea ca'a'ama.

**Jesosa Eyacuiñajjiya Bacua Ejja quea ja'a nee nee  
esohuidojojji cuana quea ja'a pishana**

<sup>4</sup>Eyacuiñajjiya Jesosa nequi mee cani quea ja'a nee nee. Ojaya esohuidojojji cuana ca ca nequi mee cani quea ja'a pishana. Esohuidojojji cuana bajjani canaje quea bajjani pame pishana, Eyacuiñajjiya echacoggi bajjani. Jesosa ca ca Eyacuiñajjiya Ebacua Ejja quea pame nee nee. <sup>5</sup>“Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii”. Jamaya Eyacuiñajjiya Jesosa acanaje. Eyacuiñajjiya ca ca esohuidojojji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: “¡Eya e'e jojo nee mique Chii caba cahua cuaa! E'e, miya ecue Bacua Ejja oe nei”. Jama Jesosa huohuimeya acanaje. Jama huohuimeya esohuidojojji ajjima Eyacuiñajjiya.

<sup>6</sup>Eyacuiñajjiya oja Bacua Ejja oe nei meshi yasijje huoojea jeahua esohuidojojji jama huohuime aca poa ba'a: “¡Esohuidojojji cuana, ecue Bacua Ejja oe bihuiaque, ojjaña!” Jamaya Eyacuiñajjiya aca poa Jesosajo.

<sup>7</sup>Esohuidojojji jama aca poa ba'a:

“Eyaya ecuea esohuidojojji huoojeaña quea cuejipashi nee nee pojjeje jama, quea quemo nee nee beni jama”.

Jamaya Eyacuiñajji poa.

<sup>8</sup>Oja bacua ca ca Eyacuiñajjiya huohui ca poa jama ba'a:

“Miya ca ca oe ecue Bacua Ejja e'e jojo nei, e jayojjaya tii tiya Eyacuiñajjiya ca mi coma. Miya ojjaña huoojeajji poani tii tii ojjaña meshi yasijje. Quea ja'a nee nee ojjaña huoojeaña tii tii. <sup>9</sup>Ojjaña quea ja'a nee nee poani; ecuea ejjashahuabaquijji jayojja jama poani miquea quea boti nee nee poani. Mimishi cuana ca ca cajaa aña. Jamajjeya eyaya miya babaca'ya poa ojjañaja Emeshi Mese nei epojji. Ojjaña miya shajja'ajja caje ojjaña meshijo ba'eca cuaa. Pea emeshi mese shajja'ajja jjima acaje cuaa. Jamajjeya miya quea jaji nee nee poani tii”.

Jamaya yahuajo nei Eyacuiñajjiya tehue mee ca poa Jesosa nijje.

<sup>10</sup>Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

“Emeshi Mese nei, miyaya ebonei meshi pana cooa poa ojjaña.

Eyatahuatahua pana cooa poa quea huesha nee nee, ojjaña eyajo enequijji pea'ai. <sup>11</sup>Ojjaña miquea epana'yo oe poaje, meshi cuana, eyatahuatahua pea'ai. Miya ca ca nequi tiitiije'yo. E'e, miya ca ca oe nequi tiitiije'yo. Meshi etii poaje, eyatahuatahua pea'ai. Jiquio ecua daqui eyacua daqui chii poani, daqui chii chii'yajo iñajjajja'yo majje jeajeña jayojja jama eyaya meshi aje, eyatahuatahua pea'ai. <sup>12</sup>E'e, daqui chii jeajeña eyacua ehuoshoggi jayojja jama meshi, eyatahuatahua pea'ai tii'yajo eyaya cajaa aje eyacua epana'yoggi. Miya ca ca jamatii nequi tiitiije'yo quea ja'a nee nee”.

Jamaya poanaje Eyacuiñajji oja Bacua Ejja nijje, Jesosa nijje.

<sup>13</sup>E'e, jamaya Eyacuiñajjiya oja Bacua huohui ca poa esejaya ebajji jama ba'a:  
 “¡Anioquecua ecuea ebiane miijije enijje ojjaña huoojea'yojji!  
 ¡Epejjejo ishoa'ajjacue! Mi quecuajji nisho yani. Eyaya oya cuana  
 ca'a'ama po mee majje mi shajja'ajjajji po meeje'yo”.

Jamaya Eyacuiñajjiya oja Bacua Ejja ca ca oe huohui ca poa. Esohuidojojji nijje ca ca jama mimimeya po jjima.

<sup>14</sup>E'e, esohuidojojji cuana Eyacuiñajjiya huoojea'yo ca ca oe. Oya cuana huoojea cani Jesosaja epejji cuana jaahuanaa, ma onijje eyajo eba'e tiitii'yojji cuana jaahuanajji.

### ¡Jesosa shajja'ajjacue ojaya epejji nei epojji!

**2** <sup>1</sup>Ecuea epejji cuana, jamajjeya ¡shajja'ajja neineicua Jesosaja esohui ojaya epejji nei nei epojji! Yahuaajo pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya dojojea cani jayojja jama poaje; poquiquehua chana se esohui pajea'yo majje. <sup>2</sup>Yahuaajo nei nei Eyacuiñajjiya esohuidojojji esejaya etiuiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea esohuidojojji esohui e'e nei!” jamaya Eyacuiñajjiya etiuiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajjajojo quea nee nee po mee ca'ya poa. <sup>3</sup>Jjeya ca ca Eyacuiñajjiya eseya quea pame nee nee acani. Jesosa nijje jjapeequianijo, ohuaya eseya ba'e tiitii mee caje'yo eyajo. Jesosa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesosaa esejaya Emeshi Mese neiya huohui coo ca poa jama ba'a: —Enijje jjapeequiajo, eyaya miquianaya ba'e tiitii meeje'yo enijje —Jesosaa poanaje.

Majoya o shajja'ajjajji cuaa eseya huohui canaje jama ba'a: —E'e jojo nei Jesosaa eseya ba'e tiitii mee caje'yo eyajo onijje jjapeequianijo.

<sup>4</sup>Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesosaja epejji cuana ma dejjaa ajjima acani ameesahua canaje. Ma dejjaja yahuaajo ba jjima poa ba meesahua canaje pea'ai. Edojjoshahua Pame huoojea canaje pea'ai ojaya ejjashahuabaquijji jayojja jama ameesahuaa, Eyacuiñajjiya. Jamajjeya eseya ba mee canaje e'e jojo nei Jesosaa eseya ba'e tiitii mee caje'yo eyajo onijje jjapeequianijo.

### Meshi eyacuajo ojjaña huoojea'yojji poaje Jesosa

<sup>5</sup>E'e, quijje Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuiaña jama poaje ba'a: Eyacuiñajji Jesosaja epejji cuana nijje jama poanaje ba'a: —E'e jojo nei meshi eyacuajo miquianaya ona huoojeajji poaje —Eyacuiñajji jamaya poanaje Jesosaja epejji cuana nijje. Jamaya mimi jjima esohuidojojji nijje, de. <sup>6</sup>Chojja. Yahuaajo nei nei Dabi tehue meesahua ca poa Eyacuiñajjiya jama ba'a:

“Eyacuiñajji, miya jjashahuaba tiitiqiuani meshijo eba'ejji cuanajo.

Dejja cuana ca'a'ama. Quea pame pishana. Jamatii oya cuana miyaya jaahuanaña. <sup>7</sup>E'e Eyacuiñajji, yahuajo miyaya ojjaña dejja cuana quea pame anaje; esohuidojojji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee nee po meenaje.

<sup>8</sup>Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Dejja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiana cuana huoojeajji. Jamatii eseyaya baña jjeja dejja cuana ojjaña huoojeajji po jjima poani.

<sup>9</sup>Jesosa ca ca esejaya eba. Eyacuiñajjiya oya nequi mee ca poa beshahua nei esohuidojojji quea pame jayojja. Jamaya nequi mee ca poa oe pojji daqui sheme. Esey Eyacuiñajjiya quea jea nee poanijo, Jesosa ese jayojja yamijji poa; eman'o'yojjiya poa. Jamajjeja Jesosa ojjaña nahuejji mano'yonaje. Eyacuiñajjiya oya shequi mee ca o'oyanaje quea bame nee nee enequi tiitii'yojji. Pea chama' o jayojja, de.

<sup>10</sup>Eyacuiñajjiya oja Bacua Ejja nijjeja, Jesosa nijjeja ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñajji quea bihui po meejji. Oya ojjañaja Emeshi Mese tii poani; ojjaña Jesusaja epeeji nequi tiitii mee sa poani onijje: —E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñajji jjashahuabaquinaje—. Jamajjeja jamaya poaje. Ecuea Ebacua Ejja quea nee nee po meeje. Jamaya quea pame. Jamajjeja ohuaya, Jesusaa quea huiso ba'e tiitii mee caje'yo onijje eyajo —jamaya Eyacuiñajji poanaje.

<sup>11</sup>Jamajjeja Jesusaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jayojja pea'aiya. Jamajjeja oya, Jesosa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesosa poani.

<sup>12</sup>E'e, Eyacuiñajjiya esohui yahuajo nei etehue'yojo Jesosa oja Chii nijje jama poa ba'a:

“Eyacuiñajji, eya ecuea huapa pojjeama cuana nijje mimije mijo.

Eyaya miya bihuiaje ojjaña ecuea epeeji cuanaja eshajja'ajjajji jama ba'a: —Eyacuiñajji, miya ca ca oe quea ca'a nee nee nequi —jamajjeja eya sohuicuayaje”.

<sup>13</sup>Jamaya pea esohui yahuajo nei etehue'yojo Jesusaa aca poa ba'a:

“Eyacuiñajji, eya ca ca iña miyaya baña Eyacuiñajji nei nei. Miyaya eya jaahuanaña e'e jojo nei”.

Jama pea'ai poa ba'a:

“Eyacuiñajji, jeya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesusaja esohui.

<sup>14</sup>Jesosaja epeeji cuana dejja cuana aje oe yamijji. Jamajjeya oya, Jesosa poeyanaje yamijji, ese jayojjaya mano'yome epojji. Mano'yonajeya jjejojo ohuaya Edosisiquiana nei Satanasa bajjani jeabichajea ca'yonaje, ma ojjaña manomee'yojji poani jeabichajea ca'yonaje. E'e, eba'e tiitii'yojji jjejojo mete'ama eseya poaje emano'yojji. <sup>15</sup>Yahuajo ojjaña eseya quea mete jjashahuabaqui aninaje jama ba'a: —E'e de, eya manoje'yo. Jamaya quea tai. Quea mete ca iña emano'yojji —eseya poanaje.

Jesosaja epeeji nei ca ca jjashahuabaquiani jama ba'a: —E'e, eya manoje'yo. Jamatii Eyacuiñajjiya eya ba'e tiitii mee caje'yo onijje eyajo.

<sup>16</sup>Jamajjeya Jesosa dejja jayojja yamijji poeyanaje. Poeyanaje esohuidojojji jayojja pojjeama, esohuidojojji jaahuanaa pojjeama. Chojja. Jesosa poeyanaje dejja jayojja yamijji ese jaahuanaa, Amajamaja osecua cuana jaahuanaa. <sup>17</sup>Jamajjeya oya, Jesosa ese jayojjaya poanaje ojjaña ojaya epeeji nei jaahuanajji jama ba'a: Eyacuiñajji nijje emimijji etii yahuajo ba'eya Eyacuiñajjiya esohui jayojja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesusaa Eyacuiñajjiya ejjashahuabaquijji jama e'e jojo nei acani quea ja'a nee. Eseja mimishi cuijea'yojji mano'yonaje. Jamaya Eyacuiñajji ese nijje e'e jojo nei quea bei po mee canaje tii tii. <sup>18</sup>Jiquio meshijo ba'e Jesosa quea nee nee poa. Cuanaya Edosisiquiana neiya, Satanasa Jesosa quea mimishi epo meeji nisho aca poa. Jamajjeya Satanasa eseya quea mimishi po mee sa acanijo, Jesusaa eseya quea pame ba'e mee cani. Jamaya Jesusaa amesahua cani ba'a: —Chojja, eya Jesusaja epeeji poani. Ohuaya eya jaahuana canijo, quea mimishi po maja sa po ajja ca iña —jamaya Jesusaa eseya po meesahua cani.

### Jesosa quea pame nee; Moisesi quea pame pishana poa

**3** <sup>1</sup>Jamajjeya ecua epeeji cuana, ¡Jesusajo oe jjashahuabaquicue! Eyacuiñajjiya eseya babaca canaje Jesusaja epeeji epojji, onijje eyajo eba'e tiitii'yojji. E'e, ¡Jesusajo oe jjashahuaba tiitiiquicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeeji cuanajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

<sup>2</sup>E'e, Eyacuiñajjiya yahuajo Jesosa babaca ca poa ojaya epeeji cuana jaahuanajji epojji. Ojaya epeeji cuanajo onijje emimijji quea pame nee nee po mee ca poa. Ma ecua Eyacuiñajjiya huohui canaje jamaya e'e jojo nei acanaje Jesusaa. Jesusaa jayojjaya etiiquiana Moisesiya Eyacuiñajjiya epeeji cuana jaahuanaa aca poa yahuajo nei nei. <sup>3</sup>Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjiya epeeji quea ja'a nee epo meeji. ¡Quea pame nee nee Jesosa! Moisesi ca ca echacosahuajji jayojja jama poa; Jodio cuana

besahua nei Eyacuiñajji nijje jjapeequi meesahua ca poa. <sup>4</sup>E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayojjaya Jesosaa ojaya epeeji cuana yahuajo nei nei ba'ya poa quea ja'a nee onijje jjapeequi meesahua ca poa; ojaya epeeji jjeya nei ba'yani pea'ai jjapeequi meesahua cani onijje. <sup>5</sup>Jamajjeya Moisesi Eyacuiñajjiya echacojji poa. Jiquio ecua echacojjiya equijo chaco neinei cani jama jayojja Moisesiya Eyacuiñajjiya esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pea'ai. <sup>6</sup>Jesosa Quito ca ca Eyacuiñajjiya Ebacua Ejja. Oya e'equi mese jayojjaya, equi chacoji jayojja pojjeama. Eseyá ojaya equi jayojja poani. E'e, eseya Eyacuiñajjiya equi jayojja poani ca jama jjashahuabaquianijo tii ba'a: —Eya Eyacuiñajjiya epeeji. Ohuaya eya ba'e tiitii mee caje'yo onijje eyajo.

Jamajjeya ¡jamaya huohui tiitiicue! ¡Jesosa nijje quea bhui nee jjapee tiitiiquicue! Ohuaya eseya jaahuana cani quea ja'a nee nee.

### Ojaya epeeji cuana jomishoca mee caje'yo Jesosaa

<sup>7</sup>Yahuajo nei nei Edojjoshahua Pameya esejaya etiiquiana esohui tehue mee ca poa jama ba'a:

“Jeya nei Eyacuiñajji minijje mimianijo, ¡ojaya esohui shajja'ajja neineicue!

<sup>8</sup>¡A'a shajjama' pojji! ¡Miquianajaya etiiquiana jayojja jja oe a'a pojji!

Yahuajo nei Eyacuiñajjiya esohui shajja'ajja jjima poa meshi jabojo nequija.

Meshi quimajo nequi etiiquiana cuana quea mimishi nee nee poa. Jamatii

Eyacuiñajji quenequene cuaji ajja poa etiiquiana nijje. <sup>9</sup>E'e, miquianajaya

etiiquiaa yahuajo nei ba'ya poaa Eyacuiñajji ba'ajja ca poa. Jama poa

ba'a: —Eya quea mimishi poanijo jamatii Eyacuiñajjiya eya etecueajji

pojjeama —jama posoya jjabaquia poa cuana. Jamajjeya Eyacuiñajjiya

jama aca poa ba'a: —Miquianaya ca jja ca oe quea mimishi nee nee.

Quea huiso shequijame, 40 shequijame eya miquianajo ishoo'ajjaña

poa miquianajaya mimishi cuana epajea'yoggi nisho. <sup>10</sup>Jamajjeya

mimishi pajea'yo ajjajo eya quea tecue miquiana nijje poa: Miquianajaya

ejjashahuabaquijji quea quehua, quea tai. Ecuea esohui jayojja jama a sa

po'yo ajja. Jjabahuejjaqui'yo ajja —jamaya Eyacuiñajji poa—. <sup>11</sup>Jamajjeya

quea quene po majje eyaya miquianaya tecueajeaneje jama ba'a: Shajjama'

poanijo e'e jojo nei miquianaya ca mi ca oe edobiquijji pojjeama ecue

meshi quea pame yasijje ejomishocajji, quea bei eba'e'yoggi pea'ai”.

Jamaya Eyacuiñajjiya etiiquiana cuana Moisesi nijje nequi tecueajea ca poa. Jamaya yahuajo nei esohui etehue'yo poa.

<sup>12</sup>Ecuea epeeji cuana, jamajjeya oe ¡quea ja'a nee jjashahuabaquicue!

¡Eyacuiñajjiya sohui jama acue! ¡A'a quea quehua jjashahuabaquijji! Shajjama'

po majje Eyacuiñajji nijje miya jjapee pajeaqui chana'. Tecuea ca chana' mi.

Oya ca ca oe ba'e tiitiiani, de. <sup>13</sup>Jesosaja pea epeeji cuana nijje ca ca mimi

huicha'a huicha'acue jama ba'a: —¡Jeya nei Jesosa nijje ejjapee neineiqui!

Jamaya poanijo miqúanaya mimishi cuanaja edasiajji pojjeama; quea mimishi nee nee epojji pojjeama.

<sup>14</sup>E'e, Jesosa nijje jjapeequi jeahuajo eseya jjashahuaba neineiquinaje onijje eyajo eba'e tiitii'yoyji. ¡Jamaya ejjashahuabaqui poqui! Jamajjeya quijje eseya onijje ona huoojea'yoyji poaje'yo tii tii eyajo.

<sup>15</sup>E'e, jamaya yahuajo nei esohui etehue'yo poa ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji! ¡Miquianajaya etiiquiana jayojja jama a'a pojji!”

Jamaya yahuajo Dabiya tehue ca poa.

<sup>16</sup>¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa. <sup>17</sup>Ona nijje Eyacuiñajji quea quene nee poa quea shequiaja huiso nee neejo, 40 shequiajame. Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo. <sup>18</sup>Shajjama' tiitii poajojo Eyacuiñajjiya oya cuana tecuea ca poa jama ba'a: “E'e jojo nei miqúanaya ecue meshi yasijje edobiquijji pojjeama quea bei nee ejomishocajji. ¡Quea mimishi nee nee mi coma!” Jamaya Eyacuiñajjiya etiiquiana yahuajo nei nei ba'ya poa tecuea ca poa.

<sup>19</sup>Jamajjeya e'e jojo nei oya cuana meshi quea pame nee yasijje dobiqúi jjiima poa ejomishocajji Eyacuiñajjiya esohui shajja'ajja sa po ajja jjejojo, ojaya epeeji nei pojjeama jjejojya.

**Etiiquiana jayojja jama eseya ejomishocajji yasijje dobiqúi ajja po chana'**

**4** <sup>1</sup>Jamajjeya Eyacuiñajjiya yahuajo nei etiiquiana huohui ca poa jayojja jama ohuaya jjeya eseya huohui cani jama ba'a: —¡E que poe'yocue ejomishocajji, quea jjashahuabaqui bei nee nee epo'yoyji! —oya poani.

Jamajjeya ¡quea ja'a jjashahuabaquicue! ¡Pea cuana quea ja'a jjashahuabaqui meesahuacue! ¡Ojee Jesusaja epeeji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña. <sup>2</sup>E'e, yahuajo nei Eyacuiñajjiya esejaya etiiquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña pea'ai, etiiquiaa jayojjaya. Etiiquiaa cuaa jiquio esohui shajja'ajja nisho ca poa. Shajjama' poaa jjejojo eshajja'ajjajeajji shajja'ajjajea ca'ya poa. Jamajjeya Eyacuiñajjiya oya cuana jomishoca mee jjiima aca poa, etiiquiana cuana.

<sup>3</sup>Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama añajo, onijje jomishoca mee caje'yo, eseya. E'e, etiiquiana aje jja oe shajjama' poajojo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajejanaje jama ba'a: —Shajjama' poanijo e'e jojo nei miqúanaya edobiquijji pojjeama ecue meshi quea pame yasijje quea jaji nee ejomishocajji”.

Jamaya Eyacuiñajjiya aca poa. Yahuajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiiquiana shajjama' cuana tecuea ca poa jama ba'a:

“Oya cuana aje oe edobiquijji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

<sup>4</sup>E'e jojo nei pea esohui yahuajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oejje oe, 6 cahuime. Majoya ojjaña apoa amajje oya jomisho ca poa cahui oe”. <sup>5</sup>E'e, etiiquianajo aje oe jama tehueme ya pea'ai poa ba'a: “Oya cuana aje oe dobiqui jjima poaje enijje jomishocaa”.

<sup>6</sup>Jamajjeya etiiquiana cuana yahuajo nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejojo dobiqui jjima poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji que dobiquije jomishocaa. <sup>7</sup>Jamajjeya etiiquiana cuana Moisesi nijje nequi jjashajja'ajjaqui ajjajojo jomishoca mee jjima aca poa. Jamajjeya Eyacuiñajjiya quijje nei Dabi tehue mee ca poa jama ba'a etiiquianaja osecua cuana huasijje: “¡Jjeya nei jjashajja'ajjaquicue!” Jamaya Eyacuiñajji poanaje esejaya etiiquiana nijje, ma Dabi nijje nequi nijje. Jamajjeya eyaya Dabija etehue'yo huohuije o'oya jama ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji!”

Jamaya yahuajo nei Dabiya tehue ca poa etiiquianaja onijje ba'eja ebajji.

<sup>8</sup>E'e, Eyacuiñajjiya Josoe etiiquiana cuana ojaya meshi quea pame yasijje poqui meesahua ca poa. Jamatii jomishoca jjima poa; quea jjashahuabaqui ja'a po jjima. Jamajjeya esejaya eba Eyacuiñajji jjashahuabaquiani jama ba'a: —Quijje eyaya ojjaña ecuea epeeji nei cuana jomishoca meeje'yo —Eyacuiñajji poani.

<sup>9</sup>E'e, quijje Eyacuiñajjiya ojjaña ojaya epeeji cuana jomishoca tiitii mee caje'yo onijje. Yahuajo nei ohuaya me oejje oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeeji nei cuana jomishoca mee caje'yo. <sup>10</sup>Jamajjeya Eyacuiñajjiya me oejje oe cahuime chaco majje chaco pajea ca poa; o jomishoca poa jayojjaya eseya Jesosa nijje jjapeequi majje quea bei jjashahuabaquiani. Quijje chaco chaco pajeaje'yo, jomishoca tiitii'yo onijje eyajo. <sup>11</sup>Jamajjeya ¡jjashajja'ajjaquicue oe! ¡Quea ja'a nei jjashahuabaquicue Jesusaja epeeji nei epojji, e'e jojo nei onijje ejomishoca tiitii'yojji! ¡A'a oe esejaya etiiquiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

<sup>12</sup>E'e, Jesosa nijje jjapeequianajo oya ese nijje mimiani, o jayojja ameesahua cani. Ojaya esohui jayojja jama ohuaya eseya e'e jojo nei ameesahua caje'yo. E'e, ojaya esohui baa se beca jama. Jiquio ecua baa shejji shejjiya jehuija'ajea



majje esa' ba cani jama jayojjaya Eyacuiñajjiya esejaya ejjashahuabaqui'yojji cuana ba cani. E'e, Eyacuiñajjiya esohui ba neinei majje eseya jjashahuabaquiye esejaya eba'ejjiyo quea ja'a pojja'a, quea mimishi pojja'a poani. <sup>13</sup>E'e jojo nei ojjaña Eyacuiñajjiya eba oja pana'yo. Chama' Eyacuiñajjiyo ejjanequi quehuaquijji, de. Jamajjeya quijje nei o cojja nei nequi majje eseyaya huohuije'yo quio eseya eshe nequiya anequinaje cuana.

**Jesosa esejo Eyacuiñajji nijje mimianijo ¡quea ja'a nee jjapeequicue!**

<sup>14</sup>Jamajjeya ¡Jesosa nijje jjapeequicue! Jesosa ca ca oe nei Eyacuiñajji nijje mimi neinei; oya Eyacuiñajji nijje emimijji etii quea pame nee nee. Oya Eyacuiñajjiya Ebacua Ejja oe nei. Eyahuasijje poqui'yonaje. Oja Chii pejjejo nequi, Eyacuiñajji pejjejo. Onijje mimiani esejo. Jamajjeya ¡Jesosa nijje e'e nei jjapeequicue! <sup>15</sup>E'e, Jesosa Eyacuiñajji nijje mimi neinei esejo. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseya Jesosa nijje jamaya mimiajo, ohuaya eseya saja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesusaa eseya acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseya quea mimishi poajo, ohuaya, Jesusaa eseya jaahuana cani tecue'amaa jjejojo. <sup>16</sup>Jamajjeya ¡Jesosa nijje bicho'ama emimi! Ohuaya esejaya mimishi cuana cuijea caje'yo. Eseya ojaya quea jea nee poanijo quea pame nee jaahuana caje'yo tii tii. Ca'a'ama poajo quea ca'a po mee caje'yo pea'ai.

**5** <sup>1</sup>¡Bacue! Eyacuiñajjiya esohui jama jayojja esejaya etiiquianaa beca dejja onijje nequi babaca ca poa Eyacuiñajji nijje emimijji etii epojji. Babaca majje huoojea ca poa jama ba'a: —¡Eyacuiñajji nijje mimicue esejo! ¡Aquiana cuana, ijjiacajji cuana ehune' nequi pea'ai dahuacue ecuanaja yajji, Eyacuiñajji ecuanaja mimishijo quea bei epo meeji! —jamaya aca poa etiiquianaa.

<sup>2</sup>Ojjaña esejaya etiiquiana ca'a'ama, Eyacuiñajjiya esohui ba neinei po jjima cuana, quea mimishi poa. Ma Eyacuiñajji nijje emimijji etii ca'a'ama pea'aijo oya pea cuana nijje tecue'ama poa. Quea bei mimianinaje Eyacuiñajji nijje pea cuanajo. <sup>3</sup>Jamatii oya ca'a'ama jjejojo quea mimishi poani pea'ai. Jamajjeya ijjiacajji ehune' jaja majje onaja mimishijo dahuajea jeahuajo Eyacuiñajji nijje mimia poa jama ba'a: —Eyacuiñajji, ¡ecuea mimishi cuijea'yocue! —acananaje ohuaya. Majoya jama poa ba'a: —Eyacuiñajji, ¡jiquio e'aquiana meseja mimishi cuijea'yocue pea'ai! —huohuime acananaje Eyacuiñajji nijje mimianijo.

<sup>4</sup>Quea pame nee Eyacuiñajji nijje emimijji etii epojji. Dejja cuana mimi ajja Eyacuiñajji nijje jama ba'a: —Eya ca iña jamatii minijje emimijji etii poaje —jamaya mimime epojji pojjeama. Chojja. Eyacuiñajjiya oeyaya iyaa majje onijje emimijji etii po mee ca poa. Jamaya yahuajo nei ohuaya ebionei onijje emimijji etii Anoni bajjani aca poa.

<sup>5</sup>Jamajjeya jamaya pea'ai Jesosa Quito Eyacuiñajji nijje emimijji etii jamatii po jjima poa. Oya Eyacuiñajjija ebadaca poa. Eyacuiñajjiya ca ca oe Jesosa onijje emimijji nei po mee ca poa yahuajo nei nei. Jama poa ba'a: “Eyaya miya ojjaña ba mee ña cuana miya ca ca oe ecue Bacua Ejja. Eya ca ca ña mique Chii” jamaya Eyacuiñajjiya Jesosa acanaje.

<sup>6</sup>Majoya huohui ca poa jama pea'ai ba'a:

“Miya enijje emimijji poaje'yo tii tii Menequisine jama. Oya yahuajo nei nei enijje emimijji nei po tiitia poa”.

Jamaya yahuajo nei nei Eyacuiñajjiya tehue mee ca poa esohui Jesusajo.

<sup>7</sup>E'e, yahuajo nei Jesosa ese nijje nequiahua oya Eyacuiñajji nijje mimi huicha'a huicha'anaje jama ba'a: —Ecue Chii, ¡nahuecue mo! Onaaya eya quecuajea ca chana' —jamaya Jesosa mimi neineinaje Eyacuiñajji nijje. Quea yeno nee nee jjejojo panaje. Oya Jesosa quea ca'a pojjeama jjabaquinaje. Oja Chii quea bihui po mee sa acanaje. Jamajjeya onijje mimiajo Eyacuiñajjiya shajja'ajja canaje. Eyacuiñajjiya Jesosa mano'yo jjima po mee sa ajjima jojjemo Jesosa mano'yo jjima poquiaye.

<sup>8</sup>Jesosa Eyacuiñajjija Bacua Ejja oe nei. Jamatii oya quea nee nee poa mimishi cuaa quecua ca'yajje. Eyacuiñajjija ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojaya eba ojjaña joya Eyacuiñajjija esohui jayojja jama ba'e sa poani jjeya meshijo ba'e quea nee nee poaje onaa napa cajje. <sup>9</sup>Jamajjeya Eyacuiñajjiya Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epojji. Pea chama' mimishi cuijea'yojji —aca poa Eyacuiñajjiya.

Jamajjeya Jesusaa esejaya mimishi cuijea'yo majje ba'e tiitii mee caje'yo, joya o shajja'ajjajji poani nei.

<sup>10</sup>E'e, yahuajo nei Eyacuiñajjiya oya huohui ca poa jama ba'a: “E'e jojo nei miya ojjaña jaahuanajji poaje. Miya enijje emimijji etii poaje'yo tii tii; Menequisine jama, ma yahuajo nei enijje emimijji nei poa jayojja jama miya poaje'yo”.

### ¡Quea ja'a nee Jesosa nijje jjapeequicue!

<sup>11</sup>Ecuea esohui ma Eyacuiñajji nijje emimijji neiyo, Menequisine bajjanijo apoa pojjeama. Maya jamatii quea camaja eba meeji. Miquianaya ca ca oe jjashahuabaqui ajjaa jjejojo Eyacuiñajjija esohui oe pojji baña. Jamajjeya jiquio esohui miquianajaya quea quehua poaje. <sup>12</sup>E'e, miquianaya yahuajo nei Jesusaja epeeji poa. Jamajjeya miquianaaya aje oe epeeji eyacua esohui ehuohuinaje ese. Jamatii onaaya miquianaya casohuihuohui huicha'a huicha'a cahua epeeji eyacua jayojja jama, de. Jiquio ecua ebacua jjeya cuaya tojjojo ba'e, bobi ijjiia po jjima jayojja jamaya miquianaaya Eyacuiñajjija esohui camaja'ama nei nei baña de, esohui ebionei camaja'ama ebajji jama. <sup>13</sup>E'e, ebacua jjeya cuaya tojjojo ba'e jayojja jama miquianaya Jesusaja epeeji eyacua jama; ojaya epeeji quea ja'a po jjima. Jamajjeya eba'eji quea tai ma Eyacuiñajjija boti'ama miquianajaya

ba jjima, eba'ejji quea pame ma Eyacuiñajjija quea boti nee miqúanajaya ba jjima pea'ai. <sup>14</sup>Jiquio ecua etiya bobi ijia cani jayojja jama Jesosaja epeeji quea ja'a neeya ojjaña ojaya esohui ba cani. Eba'ejji quea mimishi amaja ajja, ma Eyacuiñajjija boti'ama. Quea pame nee acani ohuaya. Jamaya Jesosaja epeeji quea ja'aa esohui huohui cani onajaya ebajji.

**6** <sup>1</sup>Yahuajo Jesosa nije jjapeequi jeahuaa eseyaya shajja'ajjanaje Eyacuiñajjija esohui quehua'ama. ¡Jjeya ca ca ojjaña ojaya esohui Jesosaja bacue! ¡Quea ja'a nee pocue Jesosaja epeeji etii! E'e, yahuajo jjeya nei jjapeequi jeahuaa Jesosaja esohui quehua'ama shajja'ajjanaje jama ba'a: —¡Miquea mimishi pajea'yocue! ¡Jesosaja epeeji nei pocue! <sup>2</sup>¡Onaaya miya cabeza mee cahua Jesosa nije epojji! Onaaya miqúanajaya esapajo eme' huana caje Edojjoshahua Pame miqúanaa que edobiquiji. Eyacuiñajjija emano'yo cuana shequi mee caje o'oya. Shajjama' cuana Eyacuiñajjija quea nee nee po mee caje'yo —jamaya yahuajo Jesosa nije jjapeequi jeahuaa eseyaya shajja'ajjanaje esohui quehua'ama.

<sup>3</sup>¡Jjeya ca oe Eyacuiñajjija esohuijo ojjaña ejjashajja'ajjaqui Jesosaja epeeji quea ja'a nee epojji! E'e, jamaya poaje Eyacuiñajji nije mimianijo jama ba'a: —Eyacuiñajji, ¡ecuana ba meesahuacue ojjaña miquea esohui!

<sup>4</sup>E'e, beca cuana aje oe Eyacuiñajjija esohui shajja'ajja majje jama poani ba'a: —Eya ecue mimishijo quea yeno. Mimishi pajea neineije'yo Jesosa nije ejjapeequijji —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjija esohui quea pame e'e nei shajja'ajja canaje. Eyacuiñajjija oya cuana quea pame nee acanaje. Ba mee canaje Jesosaa ba'e tiiti mee cani ojaya epeeji nei onijje eyajo. Ba mee canaje Edojjoshahua Pameya oya cuana jaahuana caje'yo pea'ai. <sup>5</sup>Ba canaje pea'ai Eyacuiñajjija esohui quea pame nee nee jayojja jama ba'yanijjo quea bei nee poaje'yo. Eyacuiñajjija acanaje jayojja ma dejjaa ajjima acani ba canaje pea'ai. E'e, jamaya ojaya eba poanaje. <sup>6</sup>Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjija Bacua acui ecueata'apeejo caca ca poa jayojja jama oya cuana Jesosa quecua'yojji jayojja poani. Jesosa cajaa ajji poani. Jesosa niñeba ca o'oyani ojjaña eshajja'ajjajji. Quea tai nee nee ca ca oma.

<sup>7</sup>Que quea pamejo ena po majamajajo bobi tii cuajiani quea pame nee. Apoa poajo equé meseya bobi chicha cani. Jamaya Eyacuiñajjija quea pame nee nee po mee cani. <sup>8</sup>Que quea taijo ca ca bobi tii ajja. Jjono, acuisha, acui pojja'a pohuani. Jamajjeya equé meseya que cajaa acani jama ba'a: —Jiquio que jehua'yonaje, cajaa —acani.

Jiquio ecua equé meseya que cajaa acani jayojjaya jama acaje'yo Eyacuiñajjija. Quea nee nee po mee caje'yo cuaquijo jiquio Jesosa cajaa ajji nei nei poani cuana.

**Jesosa cajaa a'ajja eseya ohuaya e'e jojo nei ba'e tiitii mee caje'yo onijje**

<sup>9</sup>E'e Jesosaja epeeji cuana, jiquio eyaya esohui quea tecue tehueña miqiana jjashajja'ajjaqui ajjajo. Jamatii miqianaya ecuea quea jea nee nee. Miqianajo jjashahuabaquiani jama ba'a: —Ecuea epeeji cuana, miqianaaya Jesosa cajaa yajji pojjeama. Chojja. Ojaya epeeji poanijo, Jesosaa miqianaya ojaya esohui jama atiitii meesahua caje'yo —jamaya eya poani.

<sup>10</sup>E'e, yahuajo, jjeya pea'ai miqianaaya Jesosaja epeeji cuana quea jea nee añajo pea cuana ba'e meesahuaña tii quea ja'a nee. Jamajjeya Jesosaja epeeji cuana quea jea añajo Jesosa quea jea nee añña pea'ai. Jamaya Eyacuiñajjija eba. Jamajjeya ohuaya quea pame nee nee sosequia caje'yo quea pame nee miqiaaaya añajo. E'e, ohuaya quea ja'a nee acani tii tii. <sup>11</sup>Cuanaya eyaya miqianaya huohuaña jama ba'a: ¡Jesosaja epoe o'oyajjijo ishoacue! ¡Jamaya atiitiicue! ¡Quea jaji nee ba'e tiitii poquicue ojjaña Jesosaja epeeji cuana nijje! Jamajjeya ecuea eba poaje e'e jojo nei miqianaya Jesosaja epeeji nei onijje ba'e tiitije'yo. <sup>12</sup>E'e, yahuajo Eyacuiñajjiya eseya jama acanaje ba'a: —Eyaya miqianaya ba'e tiitii meeje'yo enijje —oya poanaje.

Jamajjeya ja'a quea huea pojji! Eyacuiñajjija epeeji nei jama jjashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jjashahuabaquijji ohuaya jama ajjima e'acaje poso!

**Eyacuiñajjiya jiquio ecua ohuaya huohui canaje jamaya acani e'e jojo nei**

<sup>13-14</sup>E'e, yahuajo nei nei Eyacuiñajji miminaje esejaya etiiquiana nijje, Amajama nijje jama ba'a:

“Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya ca ca oe nei quea ca'a nee nee poanijo jamaya ameeje'yo. Chama' pea e huoojea'yojji poani”.

Jamaya Eyacuiñajjiya aca poa.

<sup>15</sup>Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajjeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei nei poa. Jamajjeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

<sup>16</sup>Eseyo ca ca jama poani ba'a: —E'e jojo nei jiquio ecua eyaya huohuaña jama neiya eyaya aje.

Jamaya po majje pea huasijje poquiani dejja etii yasijje jama huohuiya ba'a: —¡Ecuea esohui etehue'yojo miquea bajjani tehuecue ojjañaja ebajji e'e jojo nei eyaya ecuea esohui aje! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya añña.

Jamajjeya dejja etiija bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

<sup>17</sup>Oya jayojja Eyacuiñajjiya ojaya epeeji cuana jama acani ba'a: —E'e jojo nei ma ecua eyaya miqianaya huohuinaje jamaya eyaya miqianaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajjeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjañaja ebajji.

<sup>18</sup>E'e, Eyacuiñajjiya ma ecua ohua huohui ca poa jayojjaya jama acaje'yo. Oya sijje po ajja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bihui nee nee! Jiquio ecua bishe jaadobiquiajo, onaa jjonoe jaja cajo seya iñacuajiaña ehui'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo. <sup>19</sup>E'e, acui ca'aca'ajo bishe ai jeyo cani cuaa edojojea ca poajeje, ehui'yo poajeje jayojja jama eseya Jesosa nijje jjapeequiani ese jaahuanajji, ese nahuejji, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimijji etii cuana Eyacuiñajjiya equi yasijje dobiqui majje equi dojjojo pea equacuayijji sisi yasijje dobiqui majamajanaje daquija secue pene yasijje. Ma equacuayijji sisi yasijje Jodio cuana oe nei dobiquinaje Eyacuiñajji nijje mimiya ojjañaja mimishi cuijea'yojji. Jesosa ca ca eyahuasijje dobiqui'yonaje. Jjeya oya Eyacuiñajji pejejo yani. Onijje mimiani esejo. <sup>20</sup>E'e, ese eyahuasijje poqui jjimahuaajo, Jesosa eyahuasijje poqui'yonaje. Huohui canaje jama ba'a: —Ecuea epeeji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neinei quijji.

Jamajjeya Jesosa Eyacuiñajji nijje emimijji oe nei quea ca'a nee nee poani. Jamaya oya po tiitii'yani. Yahuajo nei nequi Eyacuiñajji nijje emimijji Menequisine bajjani jayojja jama poanaje Jesosa.

### Menequisine Eyacuiñajji nijje emimijji nei poa

(Genesis 14)

**7** <sup>1</sup>E'e, jiquio Menequisine yahuajo nei nei nequia poa. Oya Sanemi cuiñajji meshi mese poa. Eyacuiñajji nijje emimijji nei pea'ai poa. Eyacuiñajjiya quea ca'a nee neeya oya jamaya po mee ca poa. Jamajjeya yahuajo nei etiiquiana Amajama pea emeshi mese quea mimishi cuana quecua jeyojeyo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

<sup>2</sup>Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epojji; jama aca poa ba'a: Amajama aquiana ome miji pea'ai huisome, 10 huisome yanijo ohuaya oe quia ca poa Menequisineja epojji.

Peapea aquiana cuana ojjaña aquiana jamaya aca poa. Menequisineja bajjani Ese Ejjaja esohujio jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pea'ai oya Sanemi cuiñajji meshi mese poanijo. <sup>3</sup>Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pea'ai, ojaya ebacua ecuanajaya bajjani ba jjima pea'ai. Oya ache shono cuaya poa ba jjima, ache shono mano'ya poa ba jjima pea'ai. Chama' etehue'yo poa. Eyacuiñajjiya ca pa ca oe Menequisine huohui ca poa jama ba'a: —Menequisine, ¡miya enijje emimijji nei pocue! ¡Jamaya po titiicue! —aca poa. Oya jayojja Eyacuiñajjiya oja Bacua Ejja huohui ca poa pea'ai.

<sup>4</sup>Jamejjeja ¡jjashahuabaquicue Menequisinejo! Deja etii quea pame nee nee oya poa. Amajama ca ca deja etii quea pame nee pea'ai poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji. <sup>5</sup>Amajama mano'yaajo, quijje nei Moisesiya Amajamaja osecua Nemi bajjani Eyacuiñajjiya esohui huohui ca poa, Anonija bacua ejja. Jama aca poa ba'a: “Nemi miya, miquea ebacua cuana pea'ai Eyacuiñajji nijje emimijji poaje'yo Jodio cuanajo. Jamajjeja Jodio cuaa miya caquia cahua aquiana eba'ejji, jama caquia cahua ba'a: Ojaya ome miji pea'ai, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua” jamaya Eyacuiñajjiya esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana. <sup>6</sup>Menequisine ca ca yahuajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeja Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahuajo nei Eyacuiñajjiya Amajama huohui ca poa jama ba'a: “Amajama, jiquio meshi miquea poaje'yo. Miquea osecua cuanaja poaje'yo tii tii” aca poa Eyacuiñajjiya. “Miquea osecua cuana quea huiso nei nei poaje'yo” aca poa pea'ai.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjiya! —aca poa.

<sup>7</sup>E'e, Eyacuiñajji nijje emimijji Menequisine bajjani Amajama nijje miminaje Eyacuiñajjiya oya quea ca'a epo meeji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeja quea pame nee neejo Amajama oya iye huiso aquiana cuana quia ca poa. <sup>8</sup>Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua ejja cuana huasijje. Jamatii ma Eyacuiñajji nijje mimiani cuana mano ca poqui'ya poa. Menequisinejo ca ca Eyacuiñajjiya esohui jama poani ba'a: —Menequisine, ¡miya enijje emimijji nei po titiicue! —poani.

<sup>9-10</sup>Menequisine yahuajo ba'ya poa Amajamaja osecua jea jjimahuajo. Amajamaa iye huiso aquiana Menequisine quia canaje. Jamajjeja Jodio

cuaa huohui cani jama ba'a: —Amajamaa aquiana quia ca poa; Nemiya pea'aiya aquiana quia canaje, oya Amajamaja osecuaja cuiisa' dojjojo nequiahuaa —jamaya Jodio poani Nemijo, oja osecua cuanajo pea'ai. Jamatii quijje nei Nemiya, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca poquia poa ojaya epojji, ojaya osecua cuanaja epojji pea'ai.

<sup>11</sup> Eyacuiñajjiya Nemi, oja bacua cuana pea'ai huoojea ca poa onijje emimijji epojji, ojaya esohui Jodio cuana ba meesahuajji, quea ja'a eba'e meesahuajji pea'ai. Jamatii oya cuana aje oe dejja cuana poa, Eyacuiñajji epeejji pishana poa. Jamajjeya Eyacuiñajji esohui jayojja jama ba'e tiitii jjima poa. Jamajjeya Eyacuiñajjiya pea onijje emimijji nei huoojea canaje, Nemija osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji nijje emimijji nei poanaje, Anoni jama pojjeama. Oya Jesosa Eyacuiñajji nijje emimijji nei Menequisine jayojja jama poanaje. E'e, Jesosaa ca ca oeyaya eseya Eyacuiñajji esohui jayojja jama ameesahua cani. <sup>12</sup> E'e, Moisesija esohui jayojja jama Anonija osecua cuana Eyacuiñajji nijje emimijji cuana poa. Jjeya ca ca Eyacuiñajjiya pea onijje emimijji po mee canaje, oja Bacua Ejja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesosaja esohui jayojja jama, yahuajo jama pojjeama. Jamajjeya Eyacuiñajjiya eseya ba ca'yani mimishi'ama'yo. <sup>13-14</sup> E'e, yahuajo Eyacuiñajjiya Jesosa jama aca poa ba'a: —Jamajjeya miya enijje emimijji nei poaje'yo ecuea epeejji cuanajo —Eyacuiñajjiya aca poa.

Jamatii Jesosa Nemija osecua pojjeama poa. Pea oya de, etiquiana Jodaja jeaja osecua. Joda ca ca Eyacuiñajji nijje emimijji nei pojjeama poa. Jamajjeya Jodaja jeaja osecua cuanaja aquiana cuana dahua jjima poa mei e'lya sohuajo Eyacuiñajji quea bei mimishi cuana nijje epo meeji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjiya Jesosa jama aca poa ba'a: —Miya enijje emimijji nei nei poaje'yo ecuea epeejji cuanajo.

<sup>15</sup> Jamajjeya ecuea esohui Eyacuiñajji nijje emimijji jjeya miqianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemija osecua pojjeama. <sup>16</sup> Jamajjeya Jesosa ca ca oe Eyacuiñajji nijje emimijji nei poanaje, Eyacuiñajjiya huoojea'yo, dejjaja, Moisesija pea'ai huoojea pojjeama. Oya Jesosa quea ca'a nee nee, enequi tiitii'yo pea'ai. Jamajjeya oya Eyacuiñajji nijje emimijji nei poanaje ojaya epeejji cuanajo. <sup>17</sup> Yahuajo nei Dabiya Eyacuiñajji esohui tehue ca poa jama ba'a: “Miya enijje emimijji nei poaje'yo ecuea epeejji cuanajo. Jamaya poaje'yo tii tii, enijje emimijji nei Menequisine jayojja jama” jamaya Eyacuiñajji poanaje Jesosa Quito nijje.

<sup>18-19</sup> Etiquiana Moisesija esohui ajji poani yahuajo quea pame pojjeama ba'ya poa. Mimishi'ama po mee jjima poa. Jamajjeya etiquiana Moisesija esohui jayojja jama jjeya apajea ca'yonaje. Jjeya ca ca eseya Jesosaja



epeeji poanijo ojaya esohui jayojja jama ba'yani, yahuajo jayojja jama pojjeama. E'e, Jesosa Eyacuiñajji nijje mimiani esejo. Eyacuiñajjija bacua cuana eseya po mee cani. Jamajjeya ba'e tiitii mee caje'yo onijje eyajo.

<sup>20-21</sup>E'e, Eyacuiñajjiya Jesosa huohui ca poa jama ba'a:

“Eya Eyacuiñajji quea ca'a nee enequi tii tii quea ja'a nee. Ecuea esohui jayojja jama eyaya e'e jojo nei aje'yo. Eyaya jama huohuiaña ba'a: —Miya ecuea cuana epeejjijo mimi tiitiije'yo enijje”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijje emimijji, ese ba'e tiitii mee'yojji. Yahuajo nei Nemija osecua cuana onijje emimijji poanijo Eyacuiñajji ojjaña nijje mimi jjima. Jjeya Jesosa Eyacuiñajji nijje mimianijo ca ca Eyacuiñajji ojjaña ese nijje mimiani.

<sup>22</sup>Jamajjeya esejaya eba e'e jojo nei Eyacuiñajjija esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee nee. Jamajjeya ohuaya ojjaña ojaya epeeji cuana onijje ba'e tiitii mee caje'yo. Ma ohua Moisesi huohui ca poa ca ca quea pame pishana: Ojaya esohui jayojja jama ba'e neineiajo ojaya ehabaca poaje'yo, Eyacuiñajjija.

<sup>23</sup>Nemi nequi tiitii ajja poa Eyacuiñajji nijje pea cuanajo emimijji tii. Dejja tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijje emimijji etii cuana. E'e, oe mano'yo majje oja bacua Eyacuiñajji nijje emimijji etii poa. Jamaya popoquia poa quea huiso nee nee. <sup>24</sup>Jesosa ca ca eshe, mano'yo ajja tii tii. Jamajjeya oya Eyacuiñajji nijje e'e jojo nei mimi tiitiani esejo, oja epeeji cuanajo. <sup>25</sup>E'e, Jesosa mano'yo ajja, eshe tii tii nequi'yo Eyacuiñajji nijje esejo emimijji. Jamajjeya Jesusaja epeeji nei poanijo Eyacuiñajjija bacua cuana poani. Ohuaya eseya ba'e tiitii mee caje'yo onijje eyajo.

<sup>26</sup>Eseya aje oe quea mimishi jjejojo Eyacuiñajjija esohui jayojjaya jama ba'e jjima poaje. Jesusaa ca ca esejaya mimishi cuijea'yo majje ba'e tiitii mee caje'yo onijje. E'e, Jesosa oe nei quea pame nee nee, mimishi'ama nei nei, quea boejea nee nee, dejja mimishi jayojja jama pojjeama tii tii. Oya eyajo oja Chii pejejeo nequi, ojjaña huoojea'yojji poani tii tii.

<sup>27</sup>Nemija osecua Eyacuiñajji nijje emimijji cuana aje oe Jesosa jayojja jama pojjeama poa. Ohuaya ca ca oe quea mimishiya jjejojo ojjaña pojjajo aquiana cuana dahuajea caninaje Eyacuiñajji quea bei po meejji. Aquiana dahuajea jjimahuajo Eyacuiñajji nijje miminaje jama ba'a: —Eyacuiñajji, ꞑecuea mimishi cuijea'yocue! —jamaya Eyacuiñajji nijje emimijji etii Nemija osecuaa aca poquia poa.

Majoya oya cuana mimishijo aquiana dahuajea majje Eyacuiñajji nijje miminaje pea cuanajo jama ba'a: —Eyacuiñajji, ꞑimiquea epeeji cuanaja mimishi cuana cuijea'yocue! —aca poquia poa Eyacuiñajji nijje emimijji etiiya.

Jesosa ca ca jama pojjeama. Oya mano'yonaje ojjañaja mimishi cuijea'yojji sosejje. Oya apoa po'yonaje, emano beca'yojji pojjeama tii.

<sup>28</sup>Jamajjeya etiiquiana Moisesija esohuijo dejja cuana Eyacuiñajji nijje



emimijji po mee ca cuaa poa, Nemija osecua cuana. Oya cuana aje oe Eyacuiñajjija esohui jayojja jama ba'e'yo jjima poa. Jamajjeya Moisesi nijje mimi majje quijje nei Eyacuiñajjiya oja Bacua Ejja Jesosa jama aca poa ba'a: “Miya oe nei mimishi'ama nei nei. Jamajjeya miya oe nei enijje emimijji nei poaje'yo ecuea epeejji cuanajo” jamaya Eyacuiñajji poanaje.

**Eyajo Jesosa Quito nequi tiitiiani esejo Eyacuiñajji nijje mimiani tii tii**

**8** <sup>1</sup>Jamajjeya ijashahuabaquicue Jesosa Quitojo! Oya Eyacuiñajji nei nei. Eyajo nequi tiitiiani esejo Eyacuiñajji nijje mimiani tii tii. Eyacuiñajji quea ca'a nee nee pejjejo nequi, ebianeí mijijje; onijje ojjaña huoojeajji poani tii tii. <sup>2</sup>Jama ba'a: Yahuaajo nei Jodio Eyacuiñajji nijje emimijji etii daqui equi dojjo huasijje, equecuayijji biso nei yasijje dobiqiu'ya poa Eyacuiñajji nijje mimiya, Jodio cuana nijje Eyacuiñajji quea bei epojji. Ma daqui equi Jodio cuanaja soco poa Eyacuiñajjija esohui shajja'ajjajji. Jesosa ca ca dobiqiu'yonaje Eyacuiñajji e'anioque ani yasijje tii, daqui equi dejjaja soco huasijje pojjeama. Jomajo oya Eyacuiñajji nijje mimiani esejo. <sup>3</sup>Jiquio Jodio cuana Eyacuiñajji nijje emimijji etii cuana babaca majje jama poa ba'a: —¡Miyaya aquiana dahuacue ijjiacajji ehuone' pea'ai; Eyacuiñajji ecuana nijje quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijje emimijji neiya, Jesosaa Eyacuiñajji quea bei po mee canaje ese nijje. Eseyaya mimishi cuana cuijea mee'yojji sosejje oya mano'yonaje. <sup>4</sup>Jesosa meshijo enequi jojjemo oya Eyacuiñajji nijje emimijji etii pojjeama pome. E'e, Jodioja Eyacuiñajji nijje emimijji etii cuana meshijo yania poa, Nemija osecua cuana. Moisesija etehue'yo jayojja jama aquiana dahua ca poquianinaje Eyacuiñajji quea bei po meejji. <sup>5-6</sup>Jamaya yahuaajo poa ba'a: Moisesi eyiyo huasijje jaasohuaquiajo, Eyacuiñajjiya oya huohui ca poa daqui equijo. Jama aca poa ba'a: “¡Ecuea esohui jayojjaya nei nei daqui equi acue! ¡Quea bame nee nee oe acue!” ca poa Eyacuiñajjiya.

Jamatii daqui equi iya mee ca poa ona ba meejji ma ohua quijje Jesosaa acaje'yo eyajo. Jamajjeya Jodio cuanaja emimijji Eyacuiñajji nijje quea pame pishana poa. Jesosa ca ca quea pame nee nee. Jamaya pea'ai Eyacuiñajjiya yahuaajo nei ojaya esohui huohui ca poa Moisesija etehue'yojji. Ma esohui etehue'yo quea pame poa. Quijje ca ca Eyacuiñajjiya esohui eyacua Jesosa huohui mee ca poa. Maya esohui quea pame nee nee. E'e, esohui ma ohua jjeya huohui ca poa jayojja jama eseya añajo, Jesosaa eseya ba'e tiitii mee caje'yo onijje eyajo. Jamaya esejaya eba. Jamajjeya eseya quea jaji nee poani. Yahuaajo Jodio cuana quea jaji pishana poa: Onajaya ba jjima poa Jesosaja esohui eba'e tiitii'yojji onijje eyajo.

<sup>7</sup>E'e, yahuaajo nei Eyacuiñajjiya Jodio cuana Moisesi nijje nequi ba mee ca poa ojaya esohui. Jamatii ma esohui jayojja ohuaya acani mimishi pajea'yo jjima poa cuanaja. Ma esohui jayojja jama ba'yanijo mimishi cuijea'yojji jojjemo Eyacuiñajjija Jesosa huoojea jjima poquiaye esohui eyacua huohuiya. <sup>8</sup>Jamajjeya Eyacuiñajjiya ojaya epeejji cuana tecuea ca poa. Jama tecueame aca poa ba'a:

“Quijje eyaya esohui eyacua huohuije ojjaña Jodio cuanaja eshajja'ajjajji, ma Isaenija osecua cuanaja, Jodaja osecua cuanaja pea'ai eshajja'ajjajji. <sup>9</sup>Yahuajo nei eyaya miquijanaya etiiquiana Ejito meshijo ba'e pea meshi yasijje dojo meesahuanaje. Ecuea esohui quea pame nee huohui huicha'a huicha'a meenaje pea'ai. Jamatii etiiquiana cuana shajjama' poa. Ecuea esohui jayojja jama a sa po'yo ajja poa. Jamajjeya eyaya oya cuana jaahuana jjima a poa. Jamajjeya eyaya pea esohui quea pame nee aje'yo miquiana nijje. Jiquio esohui eyacua poaje, yahuajo jama pojjeama poaje. Eyaya jamaya huohuiaña”.

Jamaya Eyacuiñajji poanaje.

<sup>10</sup>“Quijje eyaya Isaenija osecua cuana esohui eyacua huohuije jama ba'a: Jamajjeya miquijanaya jjashahuabaqui meesahuaje ecuea ejjashahuabaquijji jayojja. Ecuea esohui jayojja jama eyaya miquijanaya ameesahuaje: —Eyacuiñajjiya ecuana jaahuana cani —miquijanaaya aje. Eyaya miquijanaya saja'aje'yo: —Miquijanaya cuana ecuea epeeji nei e'e jojo nei —eyaya aje'yo. <sup>11</sup>Miquijanaya enijje jjapeequije'yo ojjaña, edejja tii cuana, esho'iquiana pea'ai. Jamajjeya pea nijje jama epo majajji pojjeama ba'a: —¡Eyacuiñajji nijje oe jjapeequicue! —e'a majajji pojjeama cuana. Chojja, oya jja iña ojjañaja eba poaje'yo aña.

<sup>12</sup>Jamajjeya eyaya ojjaña cuanaja mimishi cuijea neineije'yo. Majoya eya jjashahuaba majaquí ajja miquijanaya mimishijo. Quea bei poaje. Jamaya eyaya Isaenija osecua cuana huohuije”.

Jamaya Eyacuiñajji yahuajo nei nei poa Isaeni nijje.

<sup>13</sup>E'e, jiquio ecua daqui chii chii'yaajo eyacua jjeshe majje daqui echii seya jeajeaña jayojja jama esohui eyacua amajje Eyacuiñajjiya esohui yahuajo nei Moisesi oja tehue meejo jjashahuaba neinei meequí'yo jjima aca poa: —¡Ecuea esohui eyacua jayojja jama acue; esohui yahuajo jayojja jama pojjeama! —jamaya Eyacuiñajjiya eseya huohui cani jjeja.

### Jodio etiiquianaja daqui equi Eyacuiñajjiya esohui bajji

**9** <sup>1</sup>Yahuajo nei Eyacuiñajjiya Moisesi huohui ca poa jama ba'a: —¡Jamaya oe enijje mimicue! ¡Jamaya eya bihuiacue pea'ai! —aca poa—. ¡Equi iyacue enijje emimijji! —aca poa pea'ai.

<sup>2</sup>Jamajjeya Jodio cuaa daqui equi soco majje iya ca poa Eyacuiñajjiya esohui shajja'ajjajji, ma Moisesi tehue mee ca poa jayojja jama e'ajji. Jamajjeya yahuajo nei iya ca poa jama ba'a: Ebionei equi equecuayijji ai'ai nequia ca poa. Ma equecuayijji ai'ajjaya cuaquijji nequijji nequia ca poa, baa huo'o. Majoya acui equecuashiyo, mesa, quecua ca poa. Mesa quecuajeyo majje cuia'asha ca poa baa huo'ohua. Majoya mesa biajje pahui ojjaña pojjaño iya majamaja ca poa piatojo Eyacuiñajjiya ebajji. Ma equecuayijji ai'ai bajjani ca poa Eyacuiñajji Nijje Ejjapeequijji bajjani. <sup>3</sup>Majoya biso nei quecuayijjime aca poa daqui equi yiyedojojo. Majoya daqui moohua secue pene ca poa. Daqui moo quea bame nee ba'ehuana ca poa esecue

jjani queyajji. Ma equecuayijji biso nei bajjani ca poa Eyacuiñajji Ese Nijje Emimijji Quea Bame bajjani. <sup>4</sup>Ma equecuayijji biso neijo nequia ca poa cuaqui cojjasha anijji baa huo'o, shiyeshiye dahuajji. Shiyeshiye dahuajea cajje huichacha quea shiye nee nee ba'esohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajjija Eshui Etehue'yo Huanajji bajjani. Ma cajohuijo baa huo'o tahuoo e'iyانبيا ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjitya etiiquiana cuana Moisesi nijje ijja mee ca poa. Anonija tojje acui ejaquecua ca'aquijji ma cajohui dojjojo ehuanانبيا jaa poa, ma tojjejo yahuajo pohua poa acui iña. Beca mei beje pea'ai cajohui dojjojo ania poa, ma mei bejejo yahuajo nei Moisesija tehue'yo Eyacuiñajjija esohui mei beje biajje oja tehue'yo, 10 esohui etehue'yo jaa poa. <sup>5</sup>Cajohui biajje ania poa cuichojji nisho esohuidojojji jayojja. Quea bame nee nee, baa huo'o pea'ai. Oja ecuichohua queya ca poa cajohui. Ma esohuidojojji nisho cajohui yasijje cojja nequia poa. Ma ba majje Jodio cuana jjashahuabaqui'ya poa Eyacuiñajji onijje yani, oja mimishi cuijea'yojji. Jamatii jjeya miya ecuea ehuhujji pojjeama ojjaña joya daqui equijo nequi aquiana.

<sup>6</sup>Ojjaña equi apoa poajo, Jodioja Eyacuiñajji nijje emimijji etii dobiquia poa equecuayijji ai'ai yasijje. Ojjaña pojjajo dobiqui nequia poa Eyacuiñajjija yajjijo chachohua. <sup>7</sup>Jamatii equecuayijji biso nei yasijje oe nei dobiquianinaje Eyacuiñajji nijje emimijji etii. Pea eshequiaja cuanajo oe dobiacquime poaninaje. Ohuaya ijjiacajji ehune na' dojodobiaqui caninaje. Majoya Eyacuiñajji nijje mimianinaje jama ba'a: —¡Eyacuiñajji, ecuea mimishi cuijea'yocue! E'e, jiquio ijjiacajji eyaya ehune' cuia'yonaje ecue mimishi cuijea'yojji sosejje —poaninaje oya.

Majoya jama poaninaje pea'ai ba'a: —¡Ojjaña miquea epeejjija mimishi cuijea'yocue pea'ai! E'e, jiquio ijjiacajji ehune' eyaya cuia'yonaje ojjañaña mimishi cuijea'yojji sosejje —poaninaje. Jamaya oya po majamaja anijo, ojjañaña oja mimishi cuana pajea'yo jjima acaninaje cuaa.

<sup>8</sup>Jamajjeya ijashahuabaquicue daqui equijo, Jodio cuanaja iyajo! Jamaya ma daqui equi enequijojoya jjeya Edojjoshahua Pameya eseya ba meesahua cani jama ba'a: Ma daqui equi e'anijo tii ma equecuayijji biso nei yasijje oe nei Eyacuiñajji nijje emimijji etii dobiquianinaje Eyacuiñajji nijje mimiya, ojjaña cuana dobiqui jjima poanaje. <sup>9</sup>E'e, Eyacuiñajji nijje mimiani etii oe nei nei dobiquianinaje Eyacuiñajji nijje mimiya. Ma shahuaba majjeya esejaya eba ojjaña cuana Eyacuiñajji nijje mimi meeme ajja poa. Jjeya ca ca eseya Eyacuiñajji nijje mimije, ojjaña. Yahuajo nei quea huiso ijjiacajji ehune' dahuajea caninaje Eyacuiñajji ona nijje quea bei epojji. Dahuajea majamaja caninaje. Jamatii oya cuana jjashahuabaquianinaje jama ba'a: —E'e pojja'a eya quea boejea pojjeama. E'e pojja'a ecuea mimishi cuijea'yo jjima —poaninaje cuana.

<sup>10</sup>Yahuajo nei bobijo tehue ca poa pea'ai Moisesija etehue'yojo jama ba'a: —¡Beca bobi a'a ijjiajji! ¡Beca e'ishijji pea'ai a'a jja oe ishijji! —jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiiquianaa piato, shajjajji cuana pea'ai shacua caninaje pea'ai. Ma etehue'yo jayojja jama besa majamajaninaje pea'ai. Jamajjeya etehue'yo jayojja jama besa majje quea yami boejea poa, jamatii quea mimishi tii poa, quea jjashahuabaqui tai. Eyacuiñajjiya oya cuana Moisesija etehue jayojja jama amee caninaje Jesosa poe jjimahuajo. Jesosa ca ca oeya ojjaña mimishi cuijea'yojji poani.

### **Jesosaja ena' cuayaquia poa eseja mimishi cuijea'yojji**

<sup>11</sup> Jamajjeya jjeja Eyacuiñajji huojea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimijji nei eyacua. Ohuaya eseya quea pame nee nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayijji biso nei yasijje dejja cuanaja iya huasijje dobiqui jjima Jesosa Eyacuiñajji nijje esejo mimiya. Cho. Oya eyahuasijje dobiquinaje Eyacuiñajji e'anioque ani yasijje, eyiye biso nei quea pame nee nee jayojja huasijje. Oya Jesosa Eyacuiñajji nijje mimiani esejo.

<sup>12</sup> Jesosaa chivo na', ana'ai na' dojodobiaqui jjima eyahuasijje, de. Cho. Oya acui ecueata'apeejo mano'yonaje esejaya mimishi cuijea'yojji sosejje. Jamajjeya ohuaya eseya ba'e tiitii mee caje'yo onijje.

<sup>13</sup> E'e, yahuajo nei Moisesija etehue'yo jayojja jama acaninaje cuaa. Jamajjeya Eyacuiñajji nijje emimijji cuaa ana'ai na', chivo na' pea'ai tepe jayojja huasijje sho majje ojjaña Jodio cuana jeasijjeya majamaja caninaje. Majoya ana'aia bacua dahuajea'yo majje oja yami equiojeyojea pohui ena tejjee nane majje ojjaña Jodio cuana jeasijjeya majamaja caninaje. Jeasijjeya cajo, pea Jodio cuaa ona ba caninaje quea boejea jayojja. Jamatii eyami nei quea boejea jayojja poaninaje. Mimishi ca ca ecuijea'yo pojjeama. <sup>14</sup> E'e, ana'ai na', chivo na' pea'ai jeasijjeya cajo, eyami ca ca oe quea boejea jayojja poaninaje. Jesosa Quito ca ca quea pame nee nee ese mimishi cuijea'yojji, de. Edojjoshahua Pame enequi tii tii. Ohuaya Jesosa ameesahua canaje Eyacuiñajji ejjashahuabaqui'yojji jayojjaya. Oya Jesosa mimishi'ama nei nei, mimishi'ama tii tii poanaje. E'e, oya acui ecueata'apeejo mano'yo majje ojaya ena' cuayaquinaje. Jamajjeya ohuaya esejaya mimishi cuijea caje'yo onijje jjapeequiyajo: —Ecue Chii, ecue na' cuayaquinajejo eyaya ecuea epeejjiya mimishi cuana cuijea neineije'yo —Jesosaa aca poa.

Jamajjeya Jesosaja epeejji nei poajo, Eyacuiñajjiya eseya quea boejea nee nee po mee cani ojaya ejjashahuabaqui'yojji jayojja jama eba'e'yojji, etiiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiiya jjejojo.

<sup>15</sup> Ojjaña joya etiiquianaja Moisesija esohui jayojja jama ajji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yojji sosejje. Jamajjeya eseya Jesosaa huohui cani jama ba'a: —Eyacuiñajjiya miqianaya ojaya esohui huohui ca o'oyani esohui eyacua jama

ba'a: “Eyaya miqúanaya quea pame nee nee aje'yo. Ojjaña ecue babaca'yo enijje ba'e titii meeje'yo eyajo” jamaya Eyacuiñajji poani —Jesosaa aca poa.

<sup>16-17</sup> Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuaa.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yojji pojjeama. O mano'yajo ca ca oe jjeshe ca'yojji. <sup>18</sup>Oya jayojja yahuajo nei Eyacuiñajjiya oja sohui tehue mee majje Moisesi aquiana quecua mee ca poa. Moisesi jama aca poa ba'a: —¡Aquiana ehuone! quecuaje'yocue! Oja na' cuayaquijajo eyaya baje miqúanaya e'e jojo nei ecuea esohui jayojja jama aña ecuea epeeji nei epojji —Eyacuiñajjiya aca poa.

<sup>19</sup> Jamajjeya Moisesiya ojjaña Eyacuiñajjiya esohui etehue'yo huohui caninaje ojjaña eshajja'ajjaji. Majoya ijjiacajji ehuone!, ana'ai, chivo pea'ai cuia caninaje. Aquiana na' tepejo sho caninaje ena tejjee. Majoya ñajajja ña huo'o acui aa quea shiyejo cuiabebo caninaje. Majoya ena tejjee nane majje esohui etehue'yo jeasiji caninaje, ojjaña Jodio cuana jeasijjea caninaje pea'ai aquiana naa. <sup>20</sup> Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miqúanaya jeasijjeaña ijjiacajji naa. ¡Eya ena' jeasijjeajje jama pocue ba'a: “E'e, eseyaya ojjaña Eyacuiñajjiya esohui jayojja jama aje'yo tii” acue! —Moisesiya aca poa.

<sup>21</sup> Jamaya pea'ai Moisesiya daqui equi acaninaje, ojjaña daqui equijo nequi aquiana pea'ai jeasijjea caninaje ijjiacajji naa, ojjaña. <sup>22</sup> Jamaya acaninaje ojjaña Jodio etiiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pea'ai. Jamaya Moisesiya sohui etehue'yo poa. E'e, Eyacuiñajjiya jama aca poa ba'a: —Ijjiacajji ehuone! quecua cajo oja na' cuayaquijajo, eyaya miqúanajaya mimishi cuijeaje'yo —aca poa.

Jamajjeya ena' cuayaqui ajjajo aje oe mimishi ecuijea'yojji pojjeama.

### **Jesosa Quito mano'yonaje mimishi cuijea neinei ca'yonaje**

<sup>23</sup> Jamajjeya ijjiacajji na' jeasijjea cajje ojjaña daqui equijo nequi aquiana quea boejea'yo jayojja po mee ca poa Jodio etiiquiaa. Jamaya acajo Eyacuiñajjiya ma aquiana ba ca poa quea boejea'yo jayojja. Jamaya Eyacuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neijo nequi mee caje'yo eyajo. E'e, aquiana naa jeasijjea cajje pojjeama eseya, Jesosaja epeeji cuana quea boejea nee poaje'yo. <sup>24</sup> Oya jayojjaya Jodioja Eyacuiñajji nijje emimijji etii equecuayijji sisi yasijje dobiquia poa Jodio cuanajo Eyacuiñajji nijje mimiya oya Jodio cuana nijje quea bei epojji. Jamaya Eyacuiñajjiya eseya ba mee cani Jesosa

Quito eyahuasijje dobiqúi'yonaje Eyacuíñajji nijje esejo mimiya. Jesosa ca ca daqui equi yasijje pojjeama dobiqúi'yonaje. Cho. Eyahuasijje dobiqúi'yonaje. Jjeya nei oya, Jesosa Quito Eyacuíñajji cojja neijo nequi, onijje esejo mimiani de, Eyacuíñajji ese nijje quea bei epojji. <sup>25</sup>Yahuajo nei jamaya poa pea'ai ba'a: Jodio Eyacuíñajji nijje mimiani etii equecuayijji biso nei yasijje dobi majamaja quianinaje. Pea shequiájajajo dobiaqui poaninaje, pea shequiájajajo dobiqúi poaninaje. Oe dobiqúime poaninaje oe shequiájajajo. Pea ena' dojodobiaqui caninaje, aquiana ehune na'. Aquiana na' jeasijjea majje jama acaninaje ba'a: —Eyacuíñajji, ¡ecuanaja mimishi cuana cuijea'yocue! —poaninaje.

Jesosa Quito ca ca ojjaña shequiájajajo pojjeama mano'ya poa. Mano'yonaje oe nei mano'yome poa. Ojaya ena' cuayaquinaje esejaya mimishi cuijea'yojji sosejje. <sup>26</sup>Jesosaja ena' aquiana na' jayojja jama poa jójjemo oya mano majamaja quiaye. E'e, dejja pana'yo majje mano majamaja quiaye quea huiso nee nee, de. Jamatii Jesosa mano'yonaje oe mano'yome poanaje, quea huiso pojjeama. Jamajjeya jjeya nei ojjaña Eyacuíñajji esohui beshahua nei apoa poanijo, Jesosa mano'yonaje. Ojaya ena' cuayaquinaje mimishi cuijea'yojji. <sup>27</sup>Esey aje oe manoj'e'yo pea'ai; oe nei mano'yome poaje'yo. Mano'yo majje Eyacuíñajji cojja neijo nequije'yo. Ohuaya huohui caje quio ese ba'ya poa sosejje. Eseyaya quea pame ba'yaninajejo ba'e tiitii mee caje'yo onijje eyajo. Quea mimishi ba'yaninajejo ca ca quea nee nee po tiitii mee caje'yo. <sup>28</sup>Jamajjeya Jesosa Quito mano'yonaje, oe mano'yome poanaje pea'ai. Oya mano'yonaje mimishi cuijea'yojji ojjañaja. E'e, yahuajo Jesosa Quito mano'ya poa. Quijje oya poeje o'oya mimishi cuijea'yohua pojjeama. Poeje'yo ojaya epeeji ba'e tiitii mee'yohua, ojjaña joya ojo jja'ishoa'ajjaquiani jjuhua'yohua.

### Ijjiacajji ehune naa jeasijjea cajo mimishi ecuijea'yo pojjeama

**10** <sup>1</sup>Jodio Eyacuíñajji nijje mimiani cuaa Moisesija etehue'yo jayojja jama amajamaja caninaje. Onajaya ba jjima pishana ma Eyacuíñajjiya quijje eseya quea pame nee nee acaje'yo. Onajaya quea ja'a pojjeama. Eyacuíñajji nijje mimiani cuaa quea huiso aquiana biajje ena' jeasijjea caje Eyacuíñajjiya ma aquiana cuana ba ca poa quea boejea jayojja. Ojjaña shequiájajajo ijjiacajji ehune' quecua majamaja majje jama poaninaje ba'a: —Eyacuíñajji, ¡miquea epeeji cuanaja mimishi cuijea'yocue ojjaña! —acandinaje Jodio cuaa.

Jamatii Eyacuíñajjiya etiiquianaja mimishi cuijea neinei'yo jjima aquiana ehune' cuia ca'yajo. <sup>2</sup>Jamajjeya aquiana ehune' cuia ca'yajo etiiquiana quea boejea nee nee epo mee jójjemo aquiana cuia majamaja jjima aca quiaye. E'e, oya cuana quea boejea nee nee epo mee jójjemo mimishijo yeno'ama poquiaye. <sup>3</sup>Jamatii ijjiacajji ehune' ojjaña shequiájajajo cuia majamaja caninaje. Jama poaninaje ba'a: —Eyacuíñajji, ¡miquea epeeji cuanaja mimishi cuijea'yocue! —acandinaje.

Cuia majje jama po ajja poaninaje ba'a: —Jjeya ca ca ecuanajaya mimishi chama'yo poaje —ajjima acaninaje. Cho. Jama poaninaje ba'a: —Ecuana quea mimishi, de —Jodio etiquiana cuana poaninaje.

<sup>4</sup>Chojja, ana'ai na', chivo na' pea'ai jeasijjea majje mimishi cuana ecujjea'yoyji pojjeama. <sup>5</sup>Jamajjeya Jesosa Quitohua poe jeahuaa oja Chii jama aca poa ba'a:

“Ecue Chii, miquea epeeji cuana aquiana ehuone' nequi cuia mee sa po'yo ajja, miya. Aquiana ehuone' dahuajea mee sa po'yo ajja pea'ai miya. Cho. Miyaya eya dejja cuana huasijje huoojeaña yamijji. <sup>6</sup>E'e, miquea epeeji cuaa aquiana ehuone' cuia cani mimishi cuijea'yoyji nisho mi quea bihui nee po meeji nisho. Ma ohua dahuajea cajoya miya quea bihui nee pojjeama poani. <sup>7</sup>Jamajjeya eyaya miya jama anaje ba'a: —Ecue Chii, eya meshi yasijje poeyanaje. Miquea ejjashahuabaqui'yoyji jayojjaya jama eyaya aje'yo. Jamaya yaya aje'yo mi quea bihui nee po meeji”.

Jamaya yahuajo oja Chii Eyacuiñajji Jesosa Quitohua acanaje. <sup>8</sup>E'e, Jesosaa oja Chii jama acanaje ba'a:

“Ecue Chii, miquea epeeji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yoyji nisho aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama”.

Jamaya acanaje Jesosaa, jamatii yahuajo Moisesija esohui etehui'yo jayojja jama Jodio cuanaa aca poquianinaje, ehuone' cuia majamaja ca poquianinaje. <sup>9</sup>Jamajjeya majoya Jesosaa jama acanaje ba'a: “Ecue Chii, eyaya miquea ejjashahuabaqui'yoyji jayojja jama aje'yo mi quea bihui nee po meeji”. Jamaya acanaje.

Jamajjeya Jesosa Quito poeyanajejo ca ca oe Eyacuiñajjiya eseya jama acani ba'a: —¡Jesosaa Quito jayojja jama pocue, oe! ¡Ecuea ejjashahuabaqui'yoyji jayojja jama oe atitiicue! Jjeya ohuaya eseya huohui maja ajja jama ba'a: —¡Jodio etiquiana yahuajo nei nei ba'ya poa jayojja jama acue! ¡Ehuone' cuia'yo majje dahuajea'yocue miquea mimishi ecujjea mee'yoyji! —Cho. Jamaya Eyacuiñajjiya eseya amaja ajja. <sup>10</sup>Jamajjeya Jesosa Quitohua Eyacuiñajjiya ejjashahuabaqui'yoyji jayojja jama acanaje. Mano'yonaje; oe mano'yome poanaje esejja mimishi cuijea'yoyji. Jamajjeya Eyacuiñajjiya eseya mimishi cuijea'yo majje quea boejea po mee ca'yani Jesosaja epeeji nei cuana.

<sup>11</sup>Yahuajo nei Jodio Eyacuiñajji nijje mimiani etii ojjaña pojja daqui equijo chachochaconaje. Ehuone' cuia majamaja caninaje mimishi cuijea mee'yoyji nisho. Ecuiajea'yoyji cuiajea ca'yaninaje de, mimishi cuijea'yo jjima poa.

<sup>12</sup>Jesosaa Quito ca ca Eyacuiñajji nijje emimijji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayojja jama pojjeama poanaje oya. Mano'yonaje mimishi cuijea'yoyji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejejeo anioque'yonaje, ebiane mijiije. Eyacuiñajji nijjeya ojjaña huoojea'yoyji poani oya, Jesosa. <sup>13</sup>Majoya jjeya



ohuaya ishoa ca ani Eyacuiñajjiya eshahua cuana, ojjaña ojaya epeeji pojjeama, shajjama' cuana pea'ai jeabichajea'yo majje quea nee nee po mee caje'yo tii tii. <sup>14</sup>E'e, Jesosa acui ecueata'apeejo mano'yonaje; ojaya epeeji mimishi'ama po mee ca poa. Jamajjeya eseya Eyacuiñajjiya esohui jayojja jama ameesahua cani.

<sup>15</sup>Edojjoshahua Pameya pea'ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeejiya ebajji. Ebionei jama poa ba'a:

<sup>16</sup>“Quije eyaya miqianaya esohui eyacua huohuije. Jamajjeya miqianaya jjashahuabaqui meesahuaje ecuea ejjashahuabaquiiji jayojja. Ecuea esohui jayojja jama eyaya miqianaya ameesahuaje”.

<sup>17</sup>Majoya ohuaya jiquio esohui tehue mee ca poa:

“Jamajjeya eyaya ojjaña cuanaja mimishi cuijea neineije'yo. Majoya eya jjashahuaba majamajaqui ajja miqianaja mimishijo. Quea bei poaje”. Eyacuiñajjiya jama tehue meemeya aca poa. <sup>18</sup>Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehuone' quecua maja ajja pea'ai, ¿ajeo quecua'yojji? Jesosa mimishi cuijea'yojji quea pame nee poanaje.

### ¡Jesosa chipi nei ejjapeequi!

<sup>19</sup>Yahuajo Jodio Eyacuiñajji nijje mimiani cuana quea mete dobiquia poa daqui equacuayijji biso nei yasijje. Dobiquia poa Eyacuiñajji nijje mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yojji. Jamajjeya Jesusaja epeeji cuana, jjeya Eyacuiñajji nijje emimi mete'ama nei. <sup>20</sup>Yahuajo nei Eyacuiñajji nijje emimijji etii oe nei daqui esecueje equacuayijji biso nei yasijje dobiqianinaje Eyacuiñajji nijje mimiya. Jjeya eseya Eyacuiñajji nijje mimiani, ojjaña. Jesosa esejo mano'yonaje. Jjeya oya eshe, enequi tii tii. Jamajjeya eseya mimi majamajani Eyacuiñajji nijje. <sup>21</sup>Oya, Jesosa Eyacuiñajji nijje emimijji nei esejo pea'ai. Eseyaa jaahuana tiitii cani, ojaya epeeji nei. <sup>22</sup>Jamajjeya eseya ojaya epeeji e'e jojo nei poanijo Eyacuiñajji nijje emimi. E'e jojo nei emimi tii tii onijje. ¡A'a jama pojji ba'a: —¡Dee! Eya quea mimishi Eyacuiñajji nijje emimijji —a'a jamaya pojji! Cho, esejaya mimishi cuana cuijea ca'yonajejo eseya quea boejea nee'yo.

<sup>23</sup>Eyacuiñajjiya ojaya esohui jayojja jama acaje'yo. Siajje po ajja oya. E'e jojo nei eseya ba'e tiitii mee caje'yo onijje eyajo. Jamaya esejaya eba. Jamajjeya ¡ejjapeequi onijje nei! <sup>24</sup>¡Jesusaja epeeji cuana quea jea nee ejja'aqui! E'e, ¡ejjashahuabaqui pea epeeji cuanajo, o ba'e meesahuajji, Jesusajo echaco sahuajji pea'ai! <sup>25</sup>Beca epeeji cuana aje oe jjachicha pajeaquinaje; ojee Eyacuiñajji bihuia ajja po'yonaje. ¡A'a oya cuana jayojja jama pojji! ¡Ojee ejjachichaqui! Jesusaja epeeji cuana nijje emimi jama ba'a: —¡Quea bihui pocue! ¡Jesosa nijje jjapeequicue ecuana nijje! —ejja'aqui.

E'e, Jesosa Quito esejaya Emeshi Mese nei poeje'yo. Jamajjeya oe jamaya epo tiitii.



**¡Jesosa Quito a'a cajaa ajji!**

<sup>26</sup>Beca cuana aje oe Eyacuiñajjija esohui e'e nei ba majje jamatii quea mimishi po tiitii sa poani. Jamajjeya ojaya mimishi ecuijea'yojji pojjeama. E'e, Jesosa ca ca oe mimishi cuijea'yojji. Pea chama'. <sup>27</sup>Jamajjeya Eyacuiñajjiya ojjaña shajjama' cuana jeajea caje'yo cuaqui yasijje onijje mi jjapeequi'yajo. Quea nee nee po tiitii mee caje'yo. <sup>28</sup>Yahuajo nei Jodio etiiquiaa Moisesija etehue'yo jayojja jama mi atiitii cajo, cuiajea ca'yaninaje, dejja etii cuaa. Beca dejja cuaa oya jayojja huohuime acajoya jama ba'a: “Oya ca ca oma shajjama', Moisesija esohui jayojja jama a sa po ajja. ¡Cacuiajea ca'yahua cuaa ca oma!” jama huohuime acajoya cuiajea ca'yaninaje dejja etiiya. Chama'yo tii aca'yaninaje cuana. <sup>29</sup>Oya jayojjaya jjeya beca cuana Eyacuiñajjija Bacua Ejjajo, Jesusajo mimipanajeapanajeani. Cajaa acani quea mimishi nee neeya jjejojo. Eyacuiñajjiya esohui quea pame nee ojjaña ba mee canaje jama ba'a: —Jesosa mano'yonaje miquianajaya mimishi cuijea'yojji —jamaya ba mee canaje.

Jamatii beca cuana sijje poani jama ba'a: —Jesosa dejja mimishi jayojja jama mano'yonaje, jamatii.

Edojjoshahua Pameya ojjaña quea pame jaahuana sa acani. Jamatii beca cuana Edojjoshahua Pame shajja'ajja sa po'yo ajja. Cajaa acani. Oya cuana quea tai nee nee poani. Jamajjeya oya cuana quea nee nee po mee caje'yo tii tii Eyacuiñajjiya. Yahuajo nei Moisesija etehue'yojo shajjama' poanijo ca ca quea tai pishana. Jamatii quecuajea ca'yaninaje cuaa. <sup>30</sup>E'e, esejaya eba Eyacuiñajjiya yahuajo tehue mee ca poa jama ba'a:

“Eyaya eyaye nei dejja mimishi quea nee nee po meeje'yo. Ojjaña joya pea cuana quea nee poani eyaya quea nee nee po meeje'yo”.

Jamaya Eyacuiñajji poa pea'ai ba'a: “Ecuea epeeji quea mimishi poajo, eyaya oya cuana ejjabahuejjaquijji quea nee po meeje”. Jamaya Eyacuiñajji poa pea'ai.

<sup>31</sup>Jamajjeya ¡quea mete nee nee capoahua ojjaña joya Jesosa Quito cajaa ajji poani, de! Eyacuiñajjiya oya cuana quea nee nee po mee caje'yo. Oya ca ca oe nei eshe nequi tii tii, quea ca'a nee nee.

**Jesosa nijje jjapeequi majje ¡quea ja'a nee po tiitiicue!**

<sup>32</sup>Ecuea epeeji cuana, ¡jjashahuabaquicue! Yahuajo Jesosa nijje jjapeequi jeahuajo miquianaya ojaya epeeji quea ja'a nee poanaje. E'e, Eyacuiñajjija esohui shajja'ajja majje miquianaya onijje jjapeequinaje. Edojjoshahua Pame miquiana que dobiquinaje pea'ai. Jamajjeya Jesusaja epeeji pojjeama cuaa miquianaya napa canaje quea huiso. Miquianaya quea nee poanaje. Jamatii Jesosa nijje jjapeequi pajea ajja poanaje, jjapee neineiquinaje. <sup>33</sup>E'e, Jesusaja epeeji pojjeama miquiana nijje mimijajinaje quea huiso ojjañaja eshajja'ajjajji. Miquianaya napa canaje pea'ai. Quea nee po mee canaje. Jamatii miquianaya mete'ama poanaje. Onaa Jesusaja epeeji napa canijo, miquianaya onijje jjapeequinaje, Jesusaja epeeji cuana nijje.

<sup>34</sup>Ejeanobia jaa huasijje pea'ai miqianaya poquinaje mete'ama Jesosaja epeeji cuana baa, ona bobiaa. Miqianaya ejeanobia jaajo aquiana sijje ca'yonaje cuaa. Jamatii miqianaya yeno'ama poanaje. Quea bihui miminaje jama ba'a: —Ecuana Jesosaja epeeji poanijo ohuaya ecua quea pame nee nee acaje'yo quijje. Ecuana ba'e titii mee caje'yo onijje eyajo —poanaje miqianaya.

<sup>35</sup>Jamajjeya ja'a jja oe Jesosa nijje jjapeepajeaqui'yojji! Onijje jjapee neineiqianijo, ohuaya miya quea pame nee acaje'yo. Eyajo miya quea huiso sosequia caje'yo pea'ai. <sup>36</sup>E'e, ¡quea bihui nee atitiicue Eyacuiñajjija esohui jama! ¡A'a hueahueajji! Jamaya miqiaaya atitiijajo, ohuaya miqianaya quea pame nee nee acaje'yo. Ojaya esohui yahuajo ohua huohui ca poa jamaya ohuaya acaje'yo. Miqianaya ba'e titii mee caje'yo onijje eyajo. <sup>37</sup>E'e, Eyacuiñajjija esohui yahuajo nei etehui'yo jama poa ba'a:

“¡Ishoa socue ojaya epoeji! Jjeya nei pojja'a oya poeje'yo, quijje nei pojjeama.

<sup>38</sup>Ojjaña joya enijje jjapee tiitiquiani eyaya baña mimishi'ama, quea boeja'yo. Enijje jjapeepajeajajo ca ca ecuea boti'ama; quea nee po meeje'yo”.

Jamaya esohui etehui'yo poa.

<sup>39</sup>Ecuana ca ca jamaya pojjeama. Jesosa nijje jjapeepajeaqui'yo ajja tii. Jamajjeya Eyacuiñajjija ecua quea nee nee epo mee'yojji pojjeama. Cho. Ecuana Jesosa nijje jjapee tiitiquianijo ohuaya ba'e titii mee caje'yo onijje eyajo.

### Beca etiquiana Eyacuiñajjija epeeji nei poa

**11** <sup>1</sup>Ecua epeeji cuana, esejaya eba nei nei jama ba'a: Jesosaja epeeji poanijo e'e jojo nei Eyacuiñajjija ojaya esohui jayojja jama eseya acaje'yo. Jamajjeya eseya jama poani ba'a: —E'e jojo nei Jesosa quea huiso esohui huohui canaje; jjeya beca cuana esejaya quea quehua. Jamatii quijje eseyaya baje'yo.

<sup>2-3</sup>Jamajjeya Jesosaja epeeji poanijo eseyaya baña Eyacuiñajjija ojjaña tii pana ca poa. E'e, oya jama poa ba'a: —Meshi cuana, ¡jjapanaquicue! —jamaya acajje meshi jjapanaquia poa. E'e, yahuajo nei ojjaña chama' nei nei poa. Jamatii Eyacuiñajjija ojjaña pana ca'ya poa.

E'e, etiquiana pea'ai Eyacuiñajji nijje jjapeequianijo, ojaya esohui jayojja jama acanijo pea'ai, Eyacuiñajji ona nijje jama poa ba'a: —Miqianaya ecua epeeji poanijo eyaya miya baña quea pame nee poani —aca poa.

### Etiqiana Abeni bajjani Eyacuiñajjija epeeji nei poa

<sup>4</sup>Abeni Eyacuiñajjija epeeji poanajejo ojaya esohui jayojja jama aca poa quea pame nee. Jamajjeya ijjiacajji ehuone' dahuaaja cajo Eyacuiñajji bihuiajji, Eyacuiñajji onijje miminaje jama ba'a: —Abeni, miya quea ja'a nee anaje. Jamaya ecua quea boti nee. Jamajjeya eyaya miya baña mimishi'ama —Eyacuiñajji poa.

Abenija o'iya Cainiya Eyacuiñajjija esohui jayojja jama pojjeama aca poa. Quea pame pojjeama aquiana quia ca poa Eyacuiñajji bihuiajji. Jamajjeya Cainija quia'yo Eyacuiñajjija boti'ama poa. Jamajjeya Caini jashahuabaquinaje jama ba'a: —Eyacuiñajjija Abeni quea jea nee poani. Ojaya eya boti'ama. Jamajjeya eyaya Abeni cuijeaje'yo —aca poa Cainiya. Jamatii ecuanaja eba Abenija Eyacuiñajjija esohui jayojja jama aca poajo ojaya epeeji nei poa. Abenija quea pame aca poajo eseya jashahuabaqui majje Eyacuiñajji nije jjapeequije quea pame nee.

#### **Etiquiana Enoca bajjani Eyacuiñajjija epeeji nei poa**

<sup>5</sup>Enoca Eyacuiñajjija epeeji nei nei poa pea'ai. Jamajjeya oya mano'yo jjima. Eyacuiñajjija oya jjequisohua ca'ya poa eyahuasije eshe tii. Onijje nequi deja cuaa oya sa'ajja ca'ya poa. Chama' ba ca'ya cuaa poa. Eyacuiñajjija esohui yahuajo nei nei tehue ca poa Enocajo jama ba'a: “Eyacuiñajjija esohui jayojja jama aca poajo Eyacuiñajji quea bihui nee poa Enocajo” jamaya tehue ca poa.

<sup>6</sup>E'e, Eyacuiñajji nije jjapeequi ajjajo, ojaya esohui jayojja jama a'ajjajo, Eyacuiñajji ojjaña ese nije quea bihui nee pojjeama poaje. Ojjaña joya Eyacuiñajji nije jjapeequi sa poani cahuohui cahua jama ba'a: —Ecuea eba Eyacuiñajji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

#### **Etiquiana Noe bajjani Eyacuiñajjija epeeji nei poa**

<sup>7</sup>Noe Eyacuiñajjija epeeji nei pea'ai poa. Jamajjeya Eyacuiñajjija oya huohui ca poa jama ba'a: —Ojjaña meshijo ba'e cuana hui'ijeaje'yo ena jjayehuequijajo. Ohuajja caje ojjaña tii —Eyacuiñajjija aca poa.

Noeja ba jjima poa ena quea quemo nee poaje. Jamatii ohuaya Eyacuiñajjija esohui shajja'ajja ca poa. Bishe, nacha quea quemo nee nee iya ca poa ojaya, oja bacua cuanaja edobiquijji, hui'i'yo jjima epojji. Jamajjeya Eyacuiñajji onijje mimia poa jama ba'a: —Noe, miya ecuea epeeji poani. Ecuea esohui jayojja jama aña. Jamajjeya eyaya miya baña mimishi'ama —aca poa.

Noeya Eyacuiñajji shajja'ajja ca poajo, eseyaya baña pea cuana aje oe shajjama' nei nei poa.

#### **Etiquiana Amajama bajjani Eyacuiñajjija epeeji nei poa**

<sup>8</sup>Amajama Eyacuiñajjija epeeji nei poa. Jamajjeya Amajamaa shajja'ajja ca poa Eyacuiñajji onijje mimiajo. Jama poa ba'a: —Amajama, ¡miqua meshijo nequi cuayaqui'yocue! ¡Poquicue pea meshi yasijje, ma miqua ba jjima huasijje! Eyaya ma meshiya miya quiaje. Miqua eba'eji poaje'yo, miqua osecua cuanaja pea'ai poaje'yo —Eyacuiñajjija aca poa.

Jamajjeya Amajamaa Eyacuiñajji shajja'ajja ca poa. Poquia poa jamatii oja ba jjima meshi yasijje. <sup>9</sup>Jamajjeya Eyacuiñajjija esohui jayojja jama poanijo oya ba'equi'ya poa pea meshi yasijje, ma Eyacuiñajjija o huohui ca poa huasijje. Ma

meshijo ba'e dejja pea poa. Jamajjeya Amajamaja equi iya jjima poa; daqui equijo ba'ya poa. Jamaya pea'ai poa oja bacua Isaaca, ojaya osecua Jacobo pea'ai.

—Jiquio meshi eyaya miya quiaje miquea eba'ejji —jamaya Eyacuiñajjiya huohui ca poa Amajama, oja bacua Isaaca, ojaya osecua Jacobo pea'ai.

<sup>10</sup>E'e, Amajama jjashahuabaquinaje pea cuiñajjijo, cuiñajji eyacuajo, ma Eyacuiñajjiya eyajo iya canijo. Amajama jama poa ba'a: —Quijje eya Eyacuiñajjiya cuiñajji eyacuajo ba'eje.

### **Etiiquiana epona Sana bajjani Eyacuiñajjiya epeeji poa**

<sup>11</sup>Sana Eyacuiñajjiya epeeji nei poa pea'ai. Jamajjeya Sana pona tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjiya oya jjamejoqui meesahua ca poa ojaya epeeji nei poanijo. Sana jjashahuabaquia poa jama ba'a: —Eyacuiñajjiya huohui canaje Amajama ecuanaja ebacuajo e'e nei. Jamajjeya ma ecua ecuanaya ohuaya huohui canaje jamaya acaje'yo e'e jojo nei —Sana poanaje.

<sup>12</sup>Amajama Eyacuiñajji niije jjapeequinaje pea'ai, oja sohuijo e'e nei jjabahuejjaquinaje. Jamajjeya dejja tii nojinoji majje, 100 shequiajame tii majje ebacua jea ca poa. Ehuanase etii nojinoji jjamejoquia poa, jamatii yahuajo nei bacuama' nei nei poa. Jamajjeya ojaya osecua quea huiso nee nee quijje jjapapaqui'ya poa. Majameta huisoajja poa, sico meeme ajja quea huiso nee nee. Meshijajjijo ani mei sisi huisoajja poa.

### **Etiiquiana cuiñajji eyacuajo eyajo jjashahuabaquianinaje**

<sup>13</sup>Jiquio etiiquiana Eyacuiñajji niije jjapee tiitiiquianinaje. Dejja tii majje mano'ya poa Eyacuiñajjiya epeeji tiya. E'e, Eyacuiñajjiya oya cuana huohui ca poa jama ba'a: —Eyaya miya jiquio meshi quiaje'yo miquea epojji, miquea osecua cuanaja epojji pea'ai.

Jamatii maya meshi ojaya pojjeama, mesena jjima poa: —Eyacuiñajjiya esohui e'e nei, ohuaya meshi quea pame nee quijje quia caje'yo ecuanaja osecua cuanaja epojji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'o —poaninaje etiiquiana—. Meshijo ca jja ca oe ecuanaja eba'e tiitiijji pojjeama. Eyajo ca ca oe ecuanaja ba'e tiitiije'yo Eyacuiñajjiya cuiñajji eyacuajo —jamaya poaninaje Amajama, Isaaca, Jacobo cuana.

<sup>14</sup>E'e, oya jamaya poaninaje pea eba'ejjiyo jjashahuabaquianinajo. Eba'ejji e'e jojo neiyo jjashahuabaquianinaje ojaya epojji tii tiijo. <sup>15</sup>Oya cuana jjashahuaba majaqui ajja poa meshijo, ma yahuajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo ajja. ¿Ajeo epoqui o'oyajji, de? —poanaje oya cuana.

<sup>16</sup>Chojja. Oya cuana pea eba'ejjiyo jjashahuabaquianinaje, eba'ejji eyacua quea pame nee nee eyajo Eyacuiñajji niije. Jamajjeya Amajama jama poa ba'a: —Eyacuiñajji, eya miquea epeeji.

Amajama jama poajo Eyacuiñajji etiiquiana nijje miminaje jama ba'a: "Miquianaya ecuea epeeji nei; eya quea bei nee miquianajo" aca poa. Jamajjeya Eyacuiñajjiya oya cuana ojaya cuiñajji eyacua quea pame nee yasijje ba'e mee caje'yo, ma ohua yahuajo eyajo pana ca'ya poa huasijje.

<sup>17-18</sup>E'e, Amajama Eyacuiñajjiya epeeji nei poa. Yahuajo Eyacuiñajjiya oya huohui ca poa: "Amajama, miquea ebacua cuayaje" aca poa. Majoya Amajamaa ebacua cuayajo Isaaca bajjani aca poa. Majoya Eyacuiñajjiya Amajama jama aca poa ba'a: "Isaacaja bacua ca ca oe eyaya baña miquea osecua e'e nei, pea cuana ca chojja" aca poa. Jamatii quijje Eyacuiñajjiya Amajama jama aca poa ba'a: "Amajama, ¡miquea ebacua ejja oe nei Isaacaja bajjani mei biájje huana majje yacua'yocue, dahuajea'yocue!" Jamaya Eyacuiñajjiya Amajama huohuime aca poa a'a e'e jojo nei ohuaya shajja'ajja caje ebajji: "Eya e'e jojo nei Amajamaja quea jea neejo, ohuaya ecuea esohui shajja'ajja caje" poanaje.

<sup>19</sup>Majoya Eyacuiñajjiya esohui shajja'ajja majje Amajamaa oja bacua ejja dojo ca poa eyacua'yojji nisho: —E'e, eyaya Eyacuiñajjiya esohui jayojja jama aje'yo; ecue bacua oe nei yacuaajeje'yo —Amajama poanaje—. E'e, eya Isaacaja yacua'yajo, Eyacuiñajjiya oya emano'yojja shequi mee caje o'oya —Amajama poanaje.

Jamajjeya Isaacaja yacua jjimahuajo Eyacuiñajjiya Amajama huohui canaje jama ba'a: "Amajama, ¡a'a miquea ebacua Isaacaja yacua'yojji!" aca poa.

Jamajjeya Amajamaa Isaacaja equi yasijje dojo ca o'oya poa, eshe. Beshahua nei Isaacaja yacua ca'yonaje. Jamajjeya eyacua'yojja shequi o'oya jayojja Isaacaja poa.

### **Etiiquiana Isaacaja, Jacobo, Jose pea'ai Eyacuiñajjiya epeeji poa**

<sup>20</sup>Isaacaja Eyacuiñajjiya epeeji nei pea'ai poa. Jamajjeya ojaya ebacua ejja Jacobo, Esao pea'ai huohui ca poa jama ba'a: —Jacobo, Esao pea'ai, ¡shajja'ajjacue mo! Ma ecua eya ohua huohui ca poa jayojja jama Eyacuiñajjiya acaje'yo miquiana nijje. Ohuaya miquiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaacaja.

<sup>21</sup>Jacobo pea'ai Eyacuiñajjiya epeeji nei poa. Jacobohua dejja tii majje oja bacua ejja Jose bajjanija bacua cuana huohui ca poa jama ba'a: —Ecuea osecua, Eyacuiñajjiya miquianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua ejja cuana.

Majoya Jacobohua Eyacuiñajji bihuia ca poa. Oya dejja tii nojinoji majje ojaya acui ejjaquecua ca'aquijjiyo nequisohuanaje Eyacuiñajji bihuiajji. Jama aca poa ba'a: —Eyacuiñajji, miya oe nei quea pame nee nee. Eyaya miya bihuiaña —aca poa Jacobohua.

<sup>22</sup>Jose pea'ai Eyacuiñajjiya epeeji nei poa. Jamajjeya tii nojinoji'yo majje mano'yo jjimahuaja Joseja oja bacua ejja huohui ca poa jama ba'a: —E'e jojo nei Eyacuiñajjiya eseya ojjaña Amajamaja pea osecua cuana nijje Ejito

meshijo nequi cuayaqui meesahua caje'yo pea meshi yasijje epoqui'yojji, eseja meshi yasijje. Jamajjeya ¡e mano'yajo ecuea esa' cuana dojo'yocue ecue meshi yasijje! ¡Jani ai yasijje huanadobiañaqui'yocue! —huohuime aca poa Joseya.

### **Etiiquiana Moisesi bajjani Eyacuiñajjija epeeji nei poa**

<sup>23</sup>Moisesija chii, ojaya enaese pea'ai Eyacuiñajjija epeeji nei nei poa. Jamajjeya Ejito meshi meseya Panao bajjaniya ojjaña Ejito meshijo ba'e cuana Jodio cuana jama aca poa ba'a: —¡Jodio cuana, miquea ebacua cuaya jeahuajo cuei yasijje jeaoqueajeacue! —aca poa.

Jamatii Moisesija chiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeaoqueajea jjima aca poa. Ba majje jama aca poa ba'a: —Jiquio ebacua quea pame nee, quea ja'a nee nee —aca poa ejeajjiya.

Jamajjeya equijo huanaquehua ca poa pea beca peejjima ba'ime onaa ejaja ca'yo poajeje. <sup>24</sup>Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjija epeeji nei poa. Jodio cuana nijje ba'e'yo sa poa, oja huapa pojjeama nijje. Moisesiya Ejito dejja jama aca poa ba'a: —¡A'a eya nequiaa jama ajji ba'a: “Miya Panaoja bacuaseja bacua” a'a eya ajji! —Moisesiya aca poa.

<sup>25</sup>Ejito dejjaa aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjija epeeji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po ajja neinei poa oya cuana quea mimishi poanijojo. Oya ca ca Eyacuiñajji nijje jjapeequi sa poa jamatii quea nee. <sup>26</sup>Jshahuabaquia poa jama ba'a: —Eyacuiñajjija huoojea'yo ojjaña jaahuanajji quea tai nee acaje'yo mimishi cuaa. Eya quea nee capoahua pea'ai o jayojjaya. Jamatii, jamaya quea pame nee. Ejito dejjaja aquiana quea nahue ecuea yani. Jamatii cajaa eyaya ajeaje —Moisesi poa. Ojaya eba poa Eyacuiñajjiya oya quea pame acaje'yo quijje onijje jjapeequianijo.

<sup>27</sup>Moisesi Eyacuiñajjija epeeji nei nei poa. Panaohua ca ca Eyacuiñajjija epeeji Jodio cuana nahue sa aca poa ojaya echacojji sosema' epojji; quea tai, quea mase oya poa. Jamatii Moisesi Panaoja mete'ama poa: —Eyaya ca iña Eyacuiñajjija epeeji Ejito meshijo ani cuayaqui meesahuaje'yo ecuanaja meshi yasijje epoqui'yojji —jamaya Moisesiya Panao aca poa mete'amaa nei. E'e, Eyacuiñajji Moisesija eba poa, jamatii Eyacuiñajji jjaba meequi ajjajojo ojaya ecojjaja ba jjima poa.

<sup>28</sup>Moisesiya Eyacuiñajjija epeeji nei poaniya jjejojo Eyacuiñajjija esohui jayojja huohuime aca poa Jodio cuana jama ba'a: —¡Najjajja cuiacue! Majoya cuia'yo majje ¡jeasijjeacue oja naa miquea esecue jjanijo esohuidojojjiya miquea ebacua ejja ecuiajeajji pojjeamajo, cojjasobo! Jamajjeya poeje shajjamaja bacua ejja cuiajeaa —Moisesiya aca poa.

Jamajjeya Moisesiya esohuidojojjiya Jodio cuanaja ebacua ejja cuia jjima amee ca poa. Majoya jamaya Jodio cuaa ojjaña shequiaja ojee ijjiya ca poa ebacua cuia'yo jjima aca poa shejo, epajea'yojji pojjeama jojaya.

<sup>29</sup>Jodio cuana Isaenija osecua cuana Eyacuiñajjija epeeji poa yahuajo nei Moisesi Jodio cuana jaahuana coojji poa. Jamajjeya Eyacuiñajjiya oya cuana bae huo'o ojje miji yasijje poqui mee ca poa ejtojji jabojsje. Ba majje Ejito dejja jama poa ba'a: —¡Cua'a! ¡Poquicue ma ecua Jodio dejja poquia bacue! —poa. Jamatii Ejito dejja epoquijji nisho po'ajja poa. Hui'i jeyojeyo'ya poa ojjaña. Enaa oya cuana jepajea ca poa.

<sup>30</sup>Isaenija osecua cuana Eyacuiñajjija epeeji poa Josoe o huoojea'yojji poanijo pea'ai. Jamajjeya Eyacuiñajjija esohui jayojja jama Jenico cuiñajji sahuajje jjajecohuiqui nequi'ya poa. Quea huiso cahuime dobiqiu jjima, me oejsje pea beca cahuime, 7 cahuime aca poa. Eyacuiñajjiya mei peeyi jaabichajea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjiya.

<sup>31</sup>Epona Shajami bajjani, ma pea cojjojji yahuajo poa Eyacuiñajjija epeeji po'yonaje. Jamajjeya Josoeja huoojea beca dejja Jenico cuiñajji quehua baa dobiqiu Shajamiya oja equi yasijje iyaaquehua ca poa onaa equecua ca poajejje. Jamajjeya Josoeja sohuinano cuaa dejja mimishi quecuajea'yo majje Shajami quecua'yo jjima poa. Josoeya huohui ca poa jama ba'a: —¡A'a Shajamija huapa pojjeama quecuajji! —aca poa.

### **Jodio etiiquiana quea huiso Eyacuiñajjija epeeji poa**

<sup>32</sup>Pea etiiquiana quea huiso Eyacuiñajjija epeeji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjija esohui huohuijji Jodio etiiquiana poa. Jjeya ca ca eyaya ojaya cuanaja eba'ejjijjo ehuhui jeyojeyojji pojjeama quea huisojojo. <sup>33</sup>Oya cuana Eyacuiñajjija epeeji nei poaninajejo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajea ca poa. Pea cuana ona huoojeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjiya. Pea cuana neonija, ibia naa ashaja ijia jjima poa Eyacuiñajjiya oya jjanaba cami meequi ca poa ojaya epeeji cuana e'ljia ca'yo poaje jjejojya. <sup>34</sup>Pea cuana Eyacuiñajjiya jaahuana canajejo quiyo'yo jjima poa. Cuaqui jiji neijo nequi quiyo'yo jjima poa. Pea cuana quehuajje poquicuaji meesahua ca poa dejja maseya equecua ca poaje jjejojya. Pea epeeji cuana ca'a'ama. Jamatii Eyacuiñajjiya quea ca'a po mee ca poa; dejja mase quea huiso cuana jeabichajea ca poa, Eyacuiñajjija epeeji pojjeama mete mee ca poa. <sup>35</sup>Epona cuana quea yeno nee nee ebacua mano'yajo poa. Jamatii Eyacuiñajjiya ebacua cuana emano'yojaa shequi mee ca o'oya poa. Quea bhui nee po mee ca poa. Pea cuana ca ca dejja mimishiya quea nee nee po mee ca'ya poa. Quea nee neejo mano'ya poa. Oya cuana huohui ca poa dejja mimishiya: —¡Eyacuiñajji nijje jjapeequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajjija epeeji nei. Oya cajaa a'ajja tii ecuea. Eya ca ca ñña mete'ama emano'yojji —saja'ame aca poa Eyacuiñajjija epeeji cuaa.

Jamajjeya aje oe quecua ca'ya cuaa poa. Ma epeeji nei jashahuabaquianinaje jama ba'a: —Eyacuiñajjija e'e jojo nei eya quea pame nee ba'e tiitii mee caje'yo onijje eyajo quijje —poa mano jjimahua.

<sup>36</sup>Dejja mimishi cuana Eyacuiñajjija epeeji cuanajo soa neineinaje ojjaña ba canijo pea'ai. Napa canaje, cuiasejjajea canaje jjonohua, jeyo canaje cadenaaa, jeanobiajea canaje. <sup>37</sup>Jajahuejjajea canaje meiya pea'ai. E'e, acui ijjisejjameejjiya oya cuana ijjisejjajea mee caninaje, esapa jajasejjajea ca poa baaa Eyacuiñajji a'a cajaa acaje'yo ebajji. Aema' poa; daquimajo ijjiacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjaña ba canaje dejja mimishi cuaa oya cuana quea tai nee nee aca poa, cajaa aca poa. Jama aca poa: —¡Dee! Jiquio dejja cuana quea tai, cajaa. ¡Ejjacuiajeaqui'yo! —aca cuaa poa.

<sup>38</sup>Jamajjeya oya cuana dejja masejo quea mete jjejojo quehuajje poquinaje. Cuajicuaji poquinaje meshi quima huasijje, eyiyo huasijje, jjani yasijje pea'ai. Equi chamajo jjanijo ba'ya poa.

<sup>39</sup>Jiquio Jodio etiiquiana Eyacuiñajjija epeeji poa, quea pame nee. Eyacuiñajji jama poa ona nijje ba'a: —Miya ecuea epeeji nei quea pame nee nee, ecuea ehuhui jayojja jama ñña.

Jamatii Eyacuiñajjija ejjashahuabaquijji quea pame nee ajjima poa ona nijje jiquio meshijo ba'yanijo. <sup>40</sup>Jamajjeya Eyacuiñajjija oya cuana ishoa mee ca poa. E'e, Eyacuiñajji jashahuabaquinaje ojjaña cuana quea boejea'yo epo mee'yojji; ojjaña yahuajo nei cuana ba'ya poa, eseya jjeya nei ba'e pea'ai quea boejea'yo epo mee'yojji. Jamajjeya ojjaña eseya ojee ba'e tiitii'yo quea boejea Eyacuiñajji nijje eyajo, ojjaña tii.

**¡Eyacuiñajjija epeeji yahuajo ba'ya poa  
jayojja ba'ecue Jesosaja epeeji nei!**

**12** <sup>1</sup>Jamajjeya ojjaña Eyacuiñajjija epeeji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajjija epeeji nei poa. ¡Ecuana jayojja pocue! —poani.

Ecuana Jesosaja epeeji dejja cuajicuajiani jama. Mimishi ca ca aquiana quea biquie eba'o ba'e jayojja. Jamatii ecuaaya ca'a'amaa jjejojo mimishi acuajiaña. Jiquio ecua dejja aquiana abo po jjima cuajicuajiani jayojja jama eseyaya mimishi ejjapajea neinei'yo Jesosaja epeeji nei epo'yojji. Oya, Jesosa esejaya ecuaajicuaji meesahuajji jayojja. Jamajjeya ojaya ejjashahuabaquijji jayojja jama ejja'a tiitii'yo. <sup>2</sup>Jamajjeya ¡Jesosajo jashahuabaquicue! Ohuaya yahuajo eseya onijje jjapeequi mee canaje. Jjeya ohuaya eseya onijje jjapee tiitiiqui meesahua cani. Jesosa jama jashahuabaqui ajja ba'a: —Chojja de, eya acui ecueata'apejo emano'yojji pojjeama —jamaya po jjima poa.



Chojja. Jesosa jama poanaje ba'a: —E'e, ojjaña enijje quea mimishi nee nee poaje. Jamatii eya ecue Chiya huohui ca poa jayojja jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee ojaya esohui jayojja jama amajje —jamaya Jesosa poanaje.

Jamajjeya Jesosa mano'yo majje Eyacuiñajji pejjejo anioquenaje ebianeí mijijje ojjaña huoojea'yojji.

<sup>3</sup>E'e, ¡jjashahuabaquicue Jesosajo! Yahuajo nei mimishi cuaa onijje quea quene nee nee po majje quea nee nee po mee canaje. Jamajjeya Jesosajo jjashahuabaquianijo miqúanaya quea yeno epojji pojjeama onaa napa cajje. Onijje jjapeequi pajea'yo ajja poaje. <sup>4</sup>Yahuajo miqúanaya ojee jjapeequianijo Jesosaja epeeji quea ja'a po'yonaje. Shajjama' po jjima. ¡Bacue! Jesosaa oja Chiya ehuhui jayojja ohua huohui cajo, mimishi cuaa quecua ca'ya poa. Miqúanaya ca ca mimishi cuaa cuia'yo jjima Jesosa nijje jjapeequianijo. <sup>5</sup>¡A'a pajea'yojji Eyacuiñajjija esohui etehue'yo! Ejeajjiya oja bacua cuana tecuea caní ejjashajja'ajjaquijji jayojja jama Eyacuiñajji ese nijje miminaje:

<sup>6</sup>“Ecuea ebacua cuana, ¡eyaya miqúanaya jjabahuejjaqui meeaña jo shajja'ajjacue mo! Eyaya miqúanaya miquea mimishijo tecueaña jo ¡a'a quea yeno pojji! E'e, ojjaña joya ecuea quea jea nee nee eyaya jjabahuejjaqui meeaña. Ecuea ebacua cuana eyaya tecueaña mimishi'ama epojji”.

Jamaya Eyacuiñajjiya, eseja Chii aya eseya aca poa.

<sup>7</sup>Jamajjeya Eyacuiñajjiya miqúanaya jjabahuejjaqui mee canijo, ¡a'a quea yeno pojji! ¡Onijje mimicue jama ba'a: —Eyacuiñajji, miya ecue Chii ai. Miyaya eya quea nee po meeña eya miquea esohuijo ejjabahuejjaqui meejji —jamaya onijje mimicue!

E'e, ¡iquio ecua seya esejaya ebacua cuana tecueaña jamaya Eyacuiñajjiya eseya acani. Eseja bacua cuana eseyaya tecueaña ejjabahuejjaquijji. <sup>8</sup>Ojjaña ejeajji cuaa oja bacua cuana niñeshe'a caní. Ejeajjiya oja bacua tecuea jjima acani shajjama' poanijo onaya mimije jama ba'a: —¡Dee! Oja bacua pojjeama pojja'a, jamajjeya mi jjabahuejjaqui mee caní. Jea jjima jama, de —acaje cuaa.

Oya jayojjaya Eyacuiñajjiya ojjaña ojaya ebacua cuana jjabahuejjaqui mee caní shajjama' epojji pojjeama. Ohuaya miqúanaya jjabahuejjaqui mee jjima acani ca ca miqúanaya oja bacua pojjeama, peaja bacua pojja'a.

<sup>9</sup>E'e, ejeajji cuaa eseya niñeshe'a caní esho'yahua ejjashajja'ajjaquijji. Jamajjeya oya jayojjaya esejaya Chii ai ejjashajja'ajja neineiqui; ohuaya eseya ba'e tiitii mee caní. <sup>10</sup>Eyacuiñajjiya eseja Chii aya ca ca eseya tecuea caní quea ja'a nee eba'ejji. Jbahuejjaqui mee caní o jayojja quea pame nee nee, quea boejea'yo nee epo tiitii meejji. Eseyaya ejeajjiya ca ca ojaya ejjashahuabaquijji jayojja jama eseya tecuea ca poa esho'yahua. <sup>11</sup>Jjeya Eyacuiñajjiya quea nee po mee caní ejjabahuejjaqui meejji eseya quea bihui pojjeama, quea yeno poani. Jamatii quijje jjabahuejja neineiqui majje eseya quea jjashahuabaqui ja'a nee poaje, quea bei nee nee poaje.

<sup>12</sup>Jamajjeya ja'a quea yeno pojji jamatii quea camaja poanijo! ¡Quea ja'a nee oe jjapeequicue Eyacuiñajji nijje! <sup>13</sup>Jamajjeya ¡ejiojji epi jaji neijje poquiani jayojja jama pocue! ¡Quea ja'a nee jjapeequicue Jessosa nijje! ¡Pea cuana jjapee neinei qui meesahuacue pea'ai Jessosa jayojja epojji!

**¡Jessosa nijje a'a jjapee pajequi'yojji!**

<sup>14</sup>Ecuea epeeji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yojji pojjeama. <sup>15</sup>¡Ba neineicue! ¡Ojjaña Eyacuiñajji nijje jjapee neinei qui meesahuacue onijje eba'e tiitii'yojji! A'a jja oe jama pojji ba'a: Acui ña quea cuaja nee nee pejeje nequi majje mano'yo chana'. Oya jayojja deja tecueya ojjaña o pejeje ba'e quea tecue po mee cani. Quea tecue po tiitiani, quea huiso quea quene po mee cani. Quea huiso quea mimishi po mee cani pea'ai. Jamajjeya ja'a quea tecue po majajji! Quea tecue po majjeya Eyacuiñajji pajea'yo chana'. <sup>16</sup>¡A'a pea cojjojji pojji pea'ai! ¡A'a etiiquiana Esao bajjani jayojja jama pojji pea'ai! Ojaya, Esaoja, yahuajo nei Eyacuiñajji esohui boti'ama poa. Ojaya ejjashahuabaquiji jayojja jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje soseje aje mi sosequiaje'yo; ma cacaa quijjojea cajo eyaya miya quiaje'yo; ecuea pojjeama poaje'yo, miquea poaje'yo —aca poa oja chahua Esaohua, jjashahuabaqui jjima jayojja poa.

<sup>17</sup>Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijje Esao oja chii nijje miminaje jama ba'a: —Ecue chii, ¡Eyacuiñajji nijje mimicue e jaahuanajji! —poa—. ¡Jama acue ba'a: “Eyacuiñajji, ¡ecuea ebacua cojjasobo Esao bajjani jaahuanacue!” acue! —jamaya Esaohua oja chii aca poa.

—Chojja, Esao. Yahuajo eya jamaya miminaje Eyacuiñajji nijje mique chahuajo, mijo pojjeama. Apoa —oja chiiya jama saja'ameya aca poa.

Jamajjeya Esao cajaa aca poa cojjasobo jayojja jama epojji pojjeama.

Jamajjeya Esao pa neineinaje, quea yeno nee nee poanaje oya chiija aquiana mesena'yo sajo. Jamatii oja chii ma ohua yahuajo esohui huohui ca poajo pajepajea'yo ajja poa pea esohui ehuhui o'oyajji. Eseyaya eba Esaoja esohui oja chahua nijje, oja chiija aquiana quia ca poa bobi soseje. Jamajjeya oja chiiya oya cojjasobo jayojja pojjeama aca'ya poa.

<sup>18</sup>Yahuajo nei nei pea'ai Eyacuiñajjiya eyiyo Sinai bajjanijo nequiya esohui huohui ca poa; Jodio etiiquiana Moisesi nijje nequi quea mete nee nee poa. E'e, yahuajo Jodio cuana eyiyo huasijje poe majje Sinai eyiyojo nequiñaquia poa. Eyiyo ba cañaquia poa jiji neinei qui. Quea bo moo eyiyo biajje nequia

poa. Quea huichacha moo, quea misi poa. Quea beni quemo pea'ai poa eyiyo biajje. Pojjeje baa siyoo pea'ai po nequia poa. <sup>19</sup>Taaa po neinei nequia poa, huaca she'ana quea quemo mia cani jayojja jama shajja'ajja ca poa Eyacuiñajjiya emimi. Ma shajja'ajja majje quea mete nee nee poa etiiquiana cuana Eyacuiñajjiyo. Jama taaame aca poa ba'a: —¡Ecuana nijje a'a mimi o'oyajji! —taaa ca poa cuana quea ajjajja nee nee jjejojo.

<sup>20</sup>“¡A'a eyiyo huasijje jaasohuajji!” Eyacuiñajjiya aca poa. “¡A'a aquiana ehuone' jaasohua meeji pea'ai! ¡Jaasohuajo ca jahahuejjajecue meiya!” Eyacuiñajjiya aca poa.

<sup>21</sup>Jamajjeya ojjaña tii quea mete nee nee poa. Ba majje etiiquiana Moisesi pea'ai quea ajjajja nee nee poa: —Eya quea mete nee nee jjejojo piopioani —Moisesi poa.

<sup>22</sup>Jjeya ca ca yahuajo jama pojjeama. Miquianaya ca ca Eyacuiñajjiya oja sohui ba mee canijo ¡a'a quea mete pojji! Miquianaya Eyacuiñajji ba'e yasijje poeyanaje. Ma eba'ejji eyiyo Sioni bajjani jayojja, ma Jenosanena eyacuajo nequi jayojja. Maya Eyacuiñajjiya cuiñajji eyacua eyajo. Jomajo Eyacuiñajji ba'e tiitiiani, eshe. Ma cuiñajjiyo Eyacuiñajjiya esohuidojojji ejjanequichichaqui; quea bihui nee nee, quea huiso nee nee nequi, de. Sicosico meemee ajja, yajja sicome yajji quea huiso nee nee oya aña.

<sup>23</sup>Jomajo Eyacuiñajjiya epeeji cuana quea bihui nee nee Eyacuiñajji pejejo yani pea'ai ma yahuajo nei nei onijje jjapeequia poa. Eyacuiñajjiya oja bajjani cuana oja esohui etehue'yojo tehue ca poa eyajo. E'e, miquianaya Eyacuiñajji nijje jjapeequiani. Ohuaya ojjaña cuana meshijo ba'e sosequia caje ojjaña ma onaa acanaje sosejje. Jomajo, eyajo Eyacuiñajjiya epeeji emano'yo cuanaja edojjoshahua cuana yani, ma yahuajo mimishi cuijea ca'ya poa cuana. <sup>24</sup>E'e, miquianaya Jesosa nijje jjapeequiani. Ohuaya ca ca oe eseya esohui eyacua huohui canaje eba'e tiitii mee'yojji. Esejo mano'yonaje pea'ai. Ojaya ena' cuayaquia poa esejaya mimishi cuijea'yojji sosejje. Oya Jesosa Adanaja bacua ejja Abeni bajjani jayojja jama pojjeama. Abenija ena' cuayaquijajo oja o'i Eyacuiñajjiya tecuea neinei ca poa echahua mese cuia ca'yajo.

<sup>25</sup>¡Jamajjeya Eyacuiñajjiya esohui shajja'ajjacue! ¡A'a shajjama' pojji! Yahuajo eyiyo Sinai pejejo Moisesiya Eyacuiñajjiya esohui huohui majamaja ca poa etiiquianaja eshajja'ajjajji nisho. Jamatii aje oe shajjama' poa. Jamajjeya Eyacuiñajjiya oya cuana quea nee po mee ca poa. Jjeya Eyacuiñajjiya eyajo nequia eseya huohui cani oja sohui eyacua, ma esejaya yahuajo shajja'ajja jjima. Shajjama' poajo e'e jojo nei ohuaya eseya quea nee nee po mee caje'yo, de. <sup>26</sup>E'e, yahuajo nei Eyacuiñajjiya eyiyo Sinai biajje sohuihuohui ca poajo, meshi huehuahuehua mee ca poa janobajjima nei. Jjeya oya jama poanaje ba'a: “Eyaya e'e jojo nei meshi, eyatahuatahua pea'ai huehuahuehua meeje'yo janobajjima nei nei” jamaya Eyacuiñajji poanaje.

<sup>27</sup>Jamajjeya Eyacuiñajjiya jama acajo ba'a: “Meshi, eyatahuatahua pea'ai huehuahuehua meeje'yo” acajo, esejaya eba ohuaya ojjaña oja pana

huehuahuehua mee'yo majje chama'yo tii poaje'yo ojjaña aquiana yahuajo oja pana'yo. Ojjaña aquiana eyacua ehuehuahuehua'yojji pojjeama anije'yo tii tii.

<sup>28</sup>Eyacuiñajji ojjaña huoojea'yojji poani tii tii. Chama' o jeabichajea'yojji epojji. Ese huoojea'yojji poani tii tii oya. Jamajjeya Eyacuiñajji ejjabihuiaqui jama ba'a: —Jamaya Eyacuiñajji, miya quea pame nee nee poani tii. Miya ecuana huoojea'yojji quea ca'a nee nee.

E'e, ¡Eyacuiñajjija esohui jayojja jama eba'e tii tii! ¡Oya ejjashajja'ajja tiitiiqui! ¡Quea mete epo tii tii; shajjama' pojjeama epo! <sup>29</sup>¡Ojo ejjashahuabaqui! Jiquio ecua cuaquijo quiyo jeajea jeyojeyo yani jayojja jama Eyacuiñajjiya shajjama' cuana quea nee nee po mee caje'yo, de.

**¡Jesosaja epeeji poanijo ba'ecue quea pame  
Eyacuiñajjija quea boti nee e'ajji!**

**13** <sup>1</sup>Ecuea epeeji cuana, ¡pea cuana Jesosaja epeeji pea'ai poanijo quea jea nee nee atiitiicue huapa pojjeama jama! <sup>2</sup>¡Pea cuana miquianajaya ba jjima quea jea acue! ¡Equi yasijje poeyajo quea pame nee acue pea'ai! ¡Miquianajaya equi yasijje iyaacue! Yahuajo beca cuana jama poanijo esohuidojojji jaahuana ca poa, jamatii oya ojaya cuana ba jjima esohuidojojji poa. Jjashahuabaquia poa jama ba'a: —E'e, jiquio dejja cuana ecuea ba jjima eyaya bobiaje —esohuidojojji pojjeama poso aca poa.

<sup>3</sup>¡Cuanaya baquicue Jesosaja epeeji joya ejeanobiajea jaa cuana! ¡A'a oya cuana pajea'yojji! ¡Jjashahuabaquicue jama ba'a: —Eya ona jayojja jama ejeanobiajea jaa jjemo quea shoe, quea yeno pome. Jamajjeya eyaya oya cuana baquije, bobi quiaje, onijje jjapeequije —pocue!

¡A'a pajea'yojji Jesosaja epeeji quea nee poani onaa napa cajo pea'ai! ¡Jjashahuabaquicue jama ba'a: —Onaa napa cajje eya quea nee pome, eya quea yeno pome. Jamajjeya eyaya oya cuana baquije quea bihui epojji. Ona nijje jjapeequije. Eyacuiñajji nijje mimije onajo pea'ai —pocue! ¡Jamajjeya oya cuana baquicue, ona nijje jjapeequicue!

<sup>4</sup>Jjashahuabaquicue jama ba'a: ¡A'a jjacojjoquijji! Yahueya, ¡miquaea ehuanase oe nei jaahuanacue! ¡Onijje tii jaacue! Ojjañaja eba jamaya quea pame nee. Jamajjeya ¡a'a quea mimishi pojji! ¡A'a pea cojjojji pojji yahue, ehuanase pea'ai! Jama poajoya Eyacuiñajjiya e'e jojo nei miquianaya tecuea neinei majje quea nee nee po mee caje'yo.

<sup>5</sup>¡A'a quea aquiana jea pojji! Eyacuiñajjiya eseya jama acanaje ba'a: “Eyaya miya epajea'yojji pojjeama nei nei. Eyaya miya ejeana'yojji pojjeama” poanaje.

<sup>6</sup>Jamajjeya miquaea aquiana eba'e meejji yanijo ¡quea bei pocue! Esohui yahuajo etehue'yo jayojja jama mimicue jama ba'a:

“Eyacuiñajjiya, Emeshi Mese neiya eya jaahuana cani tii tii. Jamajjeya eya mete'ama poani. Dejja mimishi cuaa eya jeabichajea'yojji pojjeama. Eyacuiñajjija eya ejaahuana pajea'yojji pojjeama”.

¡Jamaya mimi majamajacue!

### ¡Jpapee tiitiuicue Jesosa nijje!

<sup>7</sup> ¡A'a pajea'yoyji Eyacuiñajjija esohui huohuijji, yahuajo miqiana sohui huohuijji poa! ¡Jshahuabaquicue oya cuana quea ja'a nee ba'enaje Jesosa nijje jpapeequianijo! Mano'ya poa Jesusaja epeeji nei. ¡O jayoyjaya Jesosa nijje jpapee neineiucue! <sup>8</sup>E'e, Jesosa Quito oja sohui jayoyja jama poani, pajea'yo ajja tii tii. Ojaya ejjashahuabaquijji yahuajo nei jayoyjaya nei acani tii. Quijje nei jamaya atiitii caje'yo pea'ai. <sup>9</sup>Jamajjeya ¡peapea ehuohui'yo Jesusaja esohui e'e nei jayoyja jama pojjeama a'a shajja'ajjajji! Pea ehuohui'yo shajja'ajja majje o jayoyja mimishi mi po'yo chana'. Eyacuiñajjiya eseya quea jea nee nee acanijo esohui e'e nei ba meesahua cani Jesusaja epeeji quea ca'a nee epoyji. Pea cuaa ca ca shajja'ajjacani esohui quea quehua bobijo jama ba'a: —¡Beca bobi a'a ijjiajji Jesusaja epeeji nei epoyji! —acani Jodio etii cuaa.

Ma esohui shajja'ajja cani cuaa eshajja'ajjajeajji, de. Bobijo pojjeama Jesusaja epeeji nei poaje; ojaya esohui ba neinei majje.

<sup>10</sup> Ecuea epeeji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajjija daqui equijo chachacoaninajeya aquiana ehuone' dahua majje ijja ca poa. Jamatii Eyacuiñajjija esohui eyacua ba mee jjima poa. Eyacuiñajjija esohui eyacua bobi jayoyja. Ojaya epeeji poanijo, ohuaya eseya oja esohui jayoyja jama po mee cani, ma esohui bobi e'ijjiajji jayoyja ba meesahua cani.

<sup>11</sup> Yahuajo nei Eyacuiñajji nijje emimijji etiya aquiana na' dojodobiaqui caninaje Eyacuiñajjija equi yasijje, equecuayijji biso nei yasijje. Ojjaña shequiajajo oe dojodobiaquime acaninaje ijjiacajji ehuone na'. Dojodobiaqui majje jeasijjea caninaje Eyacuiñajjija ebajji. Jeasijjea caninaje Eyacuiñajjija etiiquianaja mimishi ecuijea'yoyji sosejje. Ma aquiana etiiquianaja ijja jjima poa. Chojja. Dojocuayaqui caninaje cuiñajji esecue yasijje edahuajea'yoyji. <sup>12</sup> Oya jayoyja Jesosa mano'yajo ojaya ena' cuayaquia poa esejaya mimishi cuijea'yoyji sosejje, mimishi'ama nei nei epo mee'yoyji. Dejja mimishi cuaa oya dojocuayaqui ca poa cuiñajji esecue yasijje equecuayoyji. <sup>13</sup> E'e, dejja mimishi cuaa oya quea tai aca poa. Jamatii Jesosa jshahuabaqui jjima jama ba'a: —Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: —Eya manojeyo acui ecueata'apeejo mimishi sosequia'yoyji —Jesosa poanaje.

Jamajjeya Jesosa jayoyja jama epo tiitiijji. Jesosa nijje jpapeequianijo, mimishi cuaa eseya quea tai acajje jamatii Jesosa nijje ejjapee tiitiiqui. <sup>14</sup> Eseyaya eba jiquio meshijo eba'e tiitiijji pojjeama. Meshi esejaya eba'e tiijji yajji pojjeama. Quijje ca ca eseya ba'e tiitiije'yo eba'ejji eyacuajo Jesosa nijje. Ma eba'ejji eyacuajo eseya jshahuabaquiani. <sup>15</sup> Jamajjeya Jesusaja epeeji poanijo ¡Eyacuiñajji ejjabihua tiitiiqui! Jama ba'a: —Eyacuiñajji, miya quea pame nee nee. Pea chama' mi jayoyja —ejja'a tiitiiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihũaña jama ba'a: —Jesosa, miya ecuanaja Emeshi Mese nei quea pame nee —oya bihũaña.

<sup>16</sup> ¡Pea cuana quea pame nee atiitícue pea'ai! ¡Nishehui'ama pocue, dejja tai'ama pocue! ¡A'a pajea'yojji! Jamaya poanijo Eyacuiñajji quea bihui nee poaje miquiana nijje.

<sup>17</sup> ¡Jesosaja epeeji jaahuanajji cuanaja esohui jayojja jama acue! ¡Shajja'ajjacue, miquianaaya! Quijje Eyacuiñajji cojja nei nequiya emeshi meseya, mi jaahuanajjiya huohui caje achajja miquianaya jaahuana canaje. Jamajjeya miquianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjajje ohuaya miya quea bihui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

<sup>18</sup> Epeeji cuana, ¡Eyacuiñajji nijje mimícue ecuanajo! Eyacuiñajji eba ecuana quea ja'a nee ba'e sa poani tii tii ojo. Ecuanaaya jjabauiani quea ja'a nee ba'yani ojaya esohui jama. <sup>19</sup> Jamajjeya ¡ecuanajo mimícue Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecuana baa! ¡Jjeya nei oe poe meesahuacue! —acue!

### Esohui quijjeyejje nei tehue'yo

<sup>20</sup> Ecuea epeeji cuana, esejaya Emeshi Mese nei Jesosa oja epeeji cuana jaahuanajji poani, ñajjajja jaahuanajji nei nei jayojja oya poani. Mano'yajo, Eyacuiñajjiya Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Ejja miquianajo mano'yonajejo, ojaya ena' cuayaquinajejo, ¡jjeya ecuea esohui eyacua jayojja jama atiitícue! Jamajjeya miquianaya ba'e tiitii meeje'yo enijje eyajo —Eyacuiñajji poanaje.

<sup>21</sup> Miquianajo eya Eyacuiñajji nijje mimiani jama ba'a: —Eyacuiñajji, ¡miqua epeeji cuana ejjaba'echejjequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miqua ejjashahuabaquijji jayojja jama ameesahuacue pea'ai! Miqua Ebacua Ejja Jesosa Quito nijje jjapeequianijo, ¡jamaya ameesahuacue Jesosa quea bihui nee epojji! ¡Oya quea ca'a nee nee quea pame nee caba'e tiitii'yahua! Jamaya Eyacuiñajji —eya poani.

<sup>22</sup> Ecuea epeeji cuana, eyaya jiquio esohui tehueña miquiana quea bihui pojji. Eyaya oe pojji esohui tehueña. Jamajjeya ¡ecuea esohui shajja'ajja neineicue quea bihui nee! <sup>23</sup> Eseyaya epeeji Timoteo ejeanobia jaa poa. Cuayaqui mee ca'yonaje. Quijje pishana oya e que poe'yo majje enijje poquije miquiana baa.

<sup>24</sup> Jamajjeya epeeji cuana, miquianajaya esohui huohuijji cuana ojjaña Eyacuiñajji epeeji cuana miquiana nijje ba'e pea'ai ¡ecuanaja esohui huohucue jama ba'a: —¿Achajja acuae nequiana ani so'o? —acue ecuanaja ebajji!

Ojjaña Eyacuiñajji epeeji cuana Itania meshijje poe miqianajo  
jjashahuabaquiani: —¿Achajja ami ani so'o? —huohui'ajjame acani ojaya ebajji.  
<sup>25</sup> ¡Eyacuiñajjiya, esejaya Chii aiya miqianaya cajaahuana cahua quea  
pame nee!

Mahuiso ecuea esohui. Eyaya Pabo bajjaniya esohui tehuejeyonaje. Apoa.